

張文襄公奏議

張文襄公全集卷七十

奏議七十

光化移駐縣治建設衙署摺

光緒三十三年七月二十八日

竊照襄陽府屬光化縣老河口地方濱臨襄河西達秦中北連豫省實爲楚邊要區水陸交衝商賈駢集盜賊會匪時復出沒其間上年正月會匪柯了凡等卽在該處謀爲不軌刻期起事幸賴地方文武先事偵知卽行撲滅近復教堂林立五方雜處治理之難尤非昔比凡籌餉緝匪安教保商在在均關緊要而縣城相距十五里往返稽延實難控制自當因地制宜以期扼要經臣

飭令該府縣詳加籌畫茲據襄陽府知府曹允源稟稱
請將光化縣治移駐老河口地方期於治理有裨核計
建設縣署捕衙監獄等項工料需錢三萬串文籌此鉅
款殊非易易查老河口尙有土堡一座建自乾隆年間
向由各幫商董於各項商業中每錢千文抽捐六文作
爲歲修經費其實歲修一項無須如此鉅款所抽歲有
盈餘皆係充作商業公舉之用茲擬商之各商董於所
抽堡工經費每年酌提若干爲修造縣署監獄等事之
用分爲五年陸續辦理其原駐舊城之均光營守備應
卽移駐河口以資彈壓舊城民戶本屬無多應令均光

營參將於所屬汎弁酌撥外委一員移往駐紮俾司巡察典史有監獄之責應隨監獄一并移駐其縣學教諭訓導各員以及壇廟學堂概仍其舊以免糜費河口既改設縣治沿河土堡應卽一律修築完固以資捍衛此項工程卽飭該縣承修一面卽日先行移駐河口一面從容督工修理飭據藩學臬三司覆核定議會詳請奏前來臣覆核無異理合恭摺具陳伏祈聖鑒
硃批該部知道欽此

商辦大冶水泥廠請暫免稅釐片

光緒三十三年七月二十八日

再現在各省奏辦鐵路所用材料以鋼軌枕木水泥爲

大宗鋼軌可取之漢陽鐵廠枕木水泥尙須購自外洋
中國森林之學未講枕木之利一時尙難收回水泥一
項外國謂之塞門德土凡築路造橋建廠等事均所必
需以中國之銀易外國之土受虧孰甚無待煩言臣查
得湖北大冶縣黃石港附近地名台子灣所產石質於
製造水泥極爲相宜曾將原料寄至德國函託使臣暨
化學家考驗許爲上等合用質料當經出示招商如有
身家殷實能集鉅股呈請承辦者准卽給札開辦並予
專利十五年以維商業在案茲據奏調湖北差委福建
存記道程祖福稟稱茲有清華公司遵照出示章程招

集華股三十萬兩情願承辦大冶縣台子灣水泥廠請
援案專利十五年俟五年後獲利漸豐由公司查照外
洋公司通例酌提盈餘報效公家並請奏懇暫免稅釐
以恤商艱等情前來臣查該道員曾經創辦清華公司
講求實業已歷多年以之開辦水泥廠必能刻期有效
異日行銷各省收回外溢之利不少當經臣札委該道
爲水泥廠總辦但事係創舉正需延聘工師購買鑛山
建造廠屋安設機器一切廠用繁費尤多中國振興實
業原爲抵制洋貨起見然非輕成本不能暢銷當此購
機雇匠悉資外洋費多本重正恐商情疑沮非賴國家

提倡維持不足以鼓舞商情前准農工商部咨開於三月十八日會同郵傳部具奏各省商辦鐵路所用材料請照官辦之路一律暫行免稅一摺奉旨依議欽此又准農工商部咨開於七月初三日具奏華商設立公司製造鐵路材料援案暫行免稅以勸工業而挽利權一摺奉旨依議欽此均經先後通行欽遵在案仰見朝廷重視路政體恤商艱之至意此次湖北設立公司自製水泥暢銷土貨既係鐵路材料之大宗相應援案仰懇天恩俯念商廠創辦維艱根基未固准其暫免稅釐其准免年限多少比照他省鐵路公司製造材料一律辦

理以勵商情而興實業

硃批該衙門知道欽此

籌辦陸軍小學變通部章摺

光緒三十三年七月二十八日

竊臣於光緒三十一年以來疊准部咨催辦陸軍小學並發給章程敦促試辦已於光緒三十二年正月十八日遵照部限開辦在案謹將練兵艱難力籌節省儲備日遵照部限開辦在案謹將練兵艱難力籌節省儲備變通辦法情形爲我 皇太后 皇上陳之竊維今日時局軍政爲第一要義揆度中國情勢非有精練陸軍百萬以外不可一省情勢大省非有五六萬人中小省非有三萬人不可然照此兵額練足歲需餉銀八九千

萬兩今日萬萬無此財力因陋就簡坐誤事機搜括取
盈尤非善策湖北爲今日水陸最衝之地又適當財源
困絀之秋臣夙夜焦思不能寢食至教兵不如教將之
說人所習聞但專恃出洋遊學之陸軍學生或本省設
學聘用外國教習教成之學生待以充用則所費太鉅
各省財力亦斷不能支而回國以後其中學問切實又
不染荒謬惡習者不能得半卽其可用者久在外洋眼
高氣盛所望甚奢非優異之官豐厚之薪不樂爲用斷
不能盡受中國鎮協各統鈐束且朝南暮北去就任意
加以此項學生有學問而無閱歷任以實事果能人人

皆克收效與否尙未可知然則學生亦不能專恃其數亦不能甚多此危道也臣於是與各項講求兵學之軍佐官及各營將領詳加籌酌因思專就培養陸軍小學堂著想與文學生注重高等小學初等小學同意將該學堂大加開拓令其可容三千人選各營正兵六千人入堂習學一日在堂上學一日在本營操練飯食本營自帶間日到堂則三千人之講堂可教六千人間日仍在本營操練則與本管營哨官不致隔氣易於鈐束五年以後此六千人皆有士官之學術設有大征戰卽用之爲營哨官以一人募練百人此六千學成之兵卽可

練六十萬人半年即可練成應用是湖北五年後可得六十萬兵之用而目前所費止六千人之餉以此例推假如各省合計有備用之學兵三萬人有事時即可得急就速練之兵三百萬惟在平時儲械與臨時籌餉耳籌議既定因自去年夏間卽已鳩工添造講堂理化堂飯廳各項屋舍目前業已工竣臣親加察閱俱甚合法各兵亦恪遵規矩計日程功其初開堂之時間有欲效學堂惡習驕妄自居不服軍紀者當經隨時嚴行懲黜以後一律肅然臣體察情勢似乎該堂所創辦法的確可行而有效茲將變通部中原章各事臚陳於左

一查原章學額定三百人分三年收錄每年收錄百人以便畢業後收入中學但教育之法以漸次淘汰爲要若每年僅收錄百人則畢業決不足百人臣現定每年收足一千人三年收滿三千一律按日到堂受業三年之後若好學者眾則分剛柔日輪班上學可以收足六千於練兵之中寓普及教育之意更番畢業更番入營教練兵士務使入伍之士皆可以與於有勇知方之選此擴充學額之變通辦理者一也

一原章收考學生應按格考選各州縣高等小學生又云各地方學堂尙未徧立以前暫准各州縣按格挑選

良家子弟但從前各省武備學堂皆挑選良家子弟往往不能耐苦成就甚少而高等小學多未畢業無從挑選臣現定於湖北陸軍各營兵士就其文理通順身體強健年齡合格在營半年以上者考選肄業晝則來堂講求學科夜則歸營免其賤役一年以來已經補足一千類能潛心肄業日有進境此考選學生之變通辦理者二也

一原章內載教授課目八一日修身二曰國文三曰洋文四曰歷史五曰地理六曰算學七曰格致八曰圖畫又載訓練課目三一日訓誡二曰操練三曰兵學統計

十一門竊思陸軍學堂無論大中小皆當注重陸軍科學方屬名實相符今觀兵學科中子目程度太淺而訓誡科中二三年所教之軍人志操軍人威儀乃係無日不講無時不講之事不必定待至二三年而始教之今改定於訓誡科中第一年仍照原奏辦理第二三兩年添教各科操典及野外要務令諸書於兵學中第一年仍照原奏辦理第二年添授築城地形軍制兵器各科第三年添授戰術及應用戰術馬學衛生學礮操馬操工作諸科所有鐘點第一年普通學四分之三兵事學四分之一第二年普通學三分之二兵事學三分之一

第三年普通學三分之一兵事學三分之二似此辦法
三年畢業不但於奏定各學科無不通曉卽原奏所未
及者亦無不知其門徑將來再入中學自能事半功倍
此增加科學之變通辦理者三也

一查原奏設總辦一員監督一員提調一員學長每百
人三員教員每百人十員但學額旣增則教員管理員
亦應加多且學生皆係軍士則管理員亦必用武官大
員方足以資鈐轄因特派第八鎮統制官張彪充當總
辦第二十一混成協統領官黎元洪充當會辦陸軍畢
業生分省試用道劉邦驥充當會辦監督將弁學堂畢

業生分省補用知府白壽銘充當提調全堂教務分學
術兩科學科長若干員會同各學科教員畫一學法術
科長若干員會同各術科教員畫一教法全堂齋務分
智信仁勇嚴五齋齋有長每齋分四舍舍有長每舍分
三講堂每講堂五十人內挑學科班長一人術科班長
一人絲聯繩貫遞相維繫全堂內務分四處曰會計處
曰庶務兼采辦處曰收發兼工程及管庫處曰稽核兼
文案處互相稽查互相箝制使各收指臂之助是以事
體雖重大而調度不繁此任用人員之變通辦理者四
也

一查原奏學生皆按年酌給津貼並供火食湖北財源枯竭異常支絀各學堂均無津貼本年火食亦擬停支未便於陸軍獨優且該學生皆係營中兵士是以仍使之按月領餉食宿仍由各本營照料學堂並不供給火食津貼仿外國通學辦法總計每年所省食宿費津貼費按照原章計算所省不下巨萬此節省經費之試辦者五也

一該堂於陸軍學以外另設附屬測繪科學兵額六十名經理科學兵額六十名軍醫科學兵額六十名海軍科學兵額六十名各爲一堂各有專師此添設學科之

變通辦者六也

總此六者雖於原章略有變通然開辦學堂總以學科完備爲第一要義若科學不完備雖一切布置均守部章亦於軍政無益本堂三年之後照部章所謂每年僅按格挑選百名自當照數挑選斷不致因本省辦法遂與部章相妨而各學程度必可深於原章所期此次挑送保定速成學堂之學生不過在堂一年半而體格成績較各省爲優其明證也前准部咨內開辦法章程與奏定章程合者爲第一項畢業後在事人員可以奏請獎勵將湖北陸軍小學列入第二項竊謂考察學堂當

以學生之成績爲主似未便不問成績而但就其外觀以定優劣况湖北學務十數年來臣所任辦理學務人員平日皆敬禮勗勉望之爲君子爲正人各學教員亦皆以道義廉恥相尙並無要求獎勵之習特在部中似不可無核實激揚之道方足以鼓勵羣才擬請飭下部臣妥定考察學務之法當於學科專精加意其他末節皆可從緩則天下學務必將日起有功不僅陸軍小學一端而已也

硃批陸軍部知道欽此

改正鄂省營制餉章摺

光緒三十三年七月二十八日

竊臣前准練兵處咨准軍機處鈔交湖廣總督張之洞奏遵編湖北常備軍兩鎮營制餉章並設督練公所一摺奉硃批議奏謹核原奏分別照准改核駁正各條咨行到鄂經臣轉飭該鎮協等遵照辦理查奏定營制餉章變通制略內稱新定章制原宜各省一體通行然各省情勢不無異同有必須量爲變通者統由各省將軍督撫查看情形隨時咨商練兵處兵部覈定請旨辦理等語具見練兵處於營制畫一之中仍兼寓因地制宜之意臣督飭藩司善後局及兵備參謀教練三處並考詢該鎮協將領詳加籌度體察現在湖北情勢有應須

遵照奏定規制者有不得不審慎周詳量予變通者除遵照此次部議分別改正外如馬礮輜重各標營所用騾馬車輛原知爲行軍所必需卽平時之操練亦極關緊要但湖北地勢非山卽水騾馬之調教旣多不便水土亦迴異西北喂養尤爲不宜其車輛原以備轉輸之用第山路多而坦途少運用亦極艱難加以近年餉項萬分支絀籌維再四惟有於該騾馬車輛等項略事變通暫作移緩就急之計擬於馬隊全標各營戰馬按照定章暫練三分之二礮隊各營騾馬則擬照部議改數目暫練三分之二輜重營擬官長全設惟目兵暫減二

分之一應需之驟馬車輛卽照減半之數暫練二分之一使具有全營規模則臨時之補充較易以上所減各項總期於足敷操練而成規不改餉力藉以稍紓此外如各營備補兵一項前於改編成軍時因人數不敷按籍選募其合格者僅敷正副兵之數自未便以不合格者遷就充補現旣餉項不充擬將備補兵概行緩設以資節省合計全年餉項可減省銀七萬七千九百三十八兩零於湖北財力稍資補苴而於軍隊實際尙不損礙總之一鎮一協章制現經按照部議一律改正其中雖有限於地勢或絀於財力不得不略爲變通者要仍

在部議範圍之內嗣後如財力稍裕自當遵照定章辦理不敢稍涉紛歧儻或遇有征調更無論財力如何爲難應於無可設法之中隨時籌畫補足期符定章而歸畫一以仰副聖朝經武圖強之至意據藩司善後局兵備參謀教練三處會同議覆詳請奏咨前來臣覆核無異謹分別開列比減清單恭呈御覽除將改正變通章程及減緩辦法造具清冊並雜支衣袴各項照數核減咨送陸軍部查核外伏祈聖鑒

硃批陸軍部議奏欽此

請獎各學堂畢業生及管理員教員摺

光緒三十三年七月

二十八日

竊查湖北學務開辦最久自臣到任後創立兩湖書院並原有之江漢經心兩書院皆以通經博古訓迪諸生兼授輿地時務各門有用之學師生在堂講習與各省書院之專試制藝詞章按期應課者不同所得類皆學行兼優之士嗣經加授算學測繪物理化學各科學名雖書院而實則與學堂無異厥後創設湖北省師範學堂並就兩湖書院改爲兩湖總師範學堂更創立文普通中學堂中路東路西路南路北路各高等小學堂農業工業學堂又次第開設武昌漢陽道府及支郡各師

範學堂共十四所武昌漢陽商業學堂各一所至方言學堂先名自強學堂開辦最早後經遷移修改始定今名現在各堂學生陸續舉行畢業考試合格者甚多在堂管理員教員任事多年頗著成效自應一律照章給予獎勵查湖北學堂凡建築設備課程各事皆經臣屢次親自講求修改已逾十年雖不敢謂完善無缺而大致均尙合法現在畢業學生計本科豫科簡易科名數在一千人以上似不可謂少而合十數學堂共得此數亦不可謂多其程度率在中學以下似不可謂高惟教員必求合格管理必求認真教科必求完全功課必求

切實此臣所與各堂師生共相戒勉者如作室然必厚其址勿崇其墉他省高等學堂有已畢業者並有已議設大學堂者湖北當俟中學生漸次畢業始行議及既深慮欲速而不達亦不敢務名而自欺現在畢業生之等級年限較之他省間或稍遜而覈其功課程度似尙較優近來考察學務者不乏通人或當不以爲妄謹舉大要約略陳之查兩湖總師範學堂學期甚多開學僅及兩年現距畢業之期尙遠此外文普通中學堂畢業生共五十一名高等農業學堂補習普通豫科畢業生第一次二十七名第二次七十二名中路高等小學生

堂畢業生共七十九名東路共七十三名西路共百二十七名南路第一次共三十一名第二次共四十名北路共六十名前設湖北省師範之附屬高等小學堂現歸入兩湖總師範之附屬高等小學堂畢業生共五十四名湖南旅鄂中學堂畢業生共五十一名又附設高等小學堂畢業生共三十七名各堂規則課程皆謹遵奏定學堂章程辦理學期程度一皆符合畢業之時均飭提學司到堂按科認真考驗惟其中學期偶有趕加鐘點辦足課程者並有辦法略與變通者如文普通中學堂南路高等小學堂開辦之初考錄諸生大率資性

聰穎國文通暢教授科學領悟甚捷當經酌增鐘點加授功課學期略短而教授完全無缺程度實屬相符與定章本意並無違礙湖南旅鄂中學堂及高等小學堂亦同此例自應准其畢業照章給予獎勵又高等農業補習普通豫科係開辦之初尙無中學畢業之合格學生故變通辦理先設補習普通豫科此時豫科畢業生實有中學程度惟較普通中學畢業年限尙少二年擬參照中學並高等小學獎勵程章酌量給獎至方言學堂第一班學生尙在四年級未屆畢業之期其前在自強學堂之舊學生曾經兩次考試畢業率皆分往各省

或任教習或充繙譯並辦理廠局商務各事現在湖北及因事回省者止三十名其肄業年期多在五年以上惟方言學堂原名自強學堂開辦遠在學堂定章之前所有重要學科皆已講授間有一二科未備再令補習俟明年暑假前再行造具分數清冊一并送部考驗核獎又湖北省師範學堂第一次簡易科畢業生共六十九名第二次共一百十九名武昌道師範學堂第一次簡易科畢業生一百一十名第二次一百四十名武昌府師範學堂第一次簡易科畢業生一百二十名第二次一百二十五名漢黃德道師範學堂簡易科畢業生

一百十七名漢陽府師範學堂簡易科畢業生一百零六名支郡師範簡易科分爲甲乙丙丁戊己庚辛壬癸十堂此時計甲堂畢業生共九十八名丙堂共九十五名乙堂共一百名丁堂共九十八名戊堂共一百十九名己堂共一百一十名查學部師範簡易科獎勵章程肄業時期須在二年以上鄂省各師範簡易科爲應各屬急需起見畢業以三學期爲限尙短一學期謹先將分數清冊送部應俟畢業諸生任義務教事四年以上如果認真合法續行請獎又武昌漢陽紳士稟官立案之公立中學堂豫備科均設在武昌省城武漢各一堂

武昌一堂畢業生共二十二名漢陽一堂共二十七名計肄業共六學期學生皆素習文學年齒略長者平時由官考察畢業之時並派專員前往考驗與高等小學畢業生程度適合惟學年較少兩年擬請按照高等小學畢業章程減等給獎以宏教育此各學堂學生先後畢業應給獎勵之實在情形也各學堂管理員向皆由臣親自選派最加審慎其自外省延訂者皆擇品行純正之士或博通經史或研精科學其選自本省者大率在書院學堂肄業最久者或十餘年其辦理學務自三四年至十餘年不等並有年期雖不甚久而辦事甚勤

或同時兼授數堂或一堂兼授數科較之專任一事之
員倍爲勞勩臣平日教育宗旨各種科學照章皆不可
缺而尤注重經史國文以忠孝大義爲根本各員尙能
恪體此意講授功課平正切實絕無偏駁之見詭異之
詞以故諸生亦皆遵守學規不染近時惡習現在各省
學務職員紛紛請獎湖北學堂各員如陳毅楊熊祥陳
曾壽皆經學部奏調派充司員其餘爲各省招致辦理
學務並給優獎者不一而足而本省管理員教員任事
甚勞其從前肄業又或甚久向未請獎查光緒二十七
年六月政務處議覆湖北武備學堂請獎案內開嗣後

均俟學生畢業在六七十人以上咨送到京考驗相符方准將在事人員請獎每案文武併計不得過六十員之數尤爲出力者准照異常勞績酌保二三員其餘均按尋常勞績給獎其在事人員仍照向章先期咨部立案並於開保時敘明各該員在堂年分造冊咨部以憑查核等語現查上年十二月學部奏定修改各學堂考試章程內開凡各省中學堂高等學堂畢業現行章程定有獎勵者既經畢業考試之後除由本學堂發給分數等第文憑外呈由提學司按照畢業分數分別等第詳請督撫咨明學部照章奏請獎勵等語今湖北省城

畢業各學堂皆屬中等學堂以下按照學部修改考試
新章所有畢業學生均毋庸送京考驗惟請獎人員之
數應援照政務處舊章辦理此次各學堂畢業生共七
百四十八名而單開請獎各員共一百二十四名其中
按異常勞績保獎者尤屬不多比照前案所定獎勵人
數有絀無贏至在事人員先期咨部立案一節因提學
司到任未久外府州縣各學堂管理員教員呈報尙未
完全正在辦理一俟彙齊卽當續行咨報請獎各員皆
在畢業各學堂辦理學務間有現充他項學堂職員者
均係在鄂出力多年所成就之學生不少前此學生畢

業從未給予獎勵各員勞績亦未一經保獎此次自應一同列入查學部定章在學堂任事三年以上方准給獎現在各員皆擇三年以上始與開列分別請獎以期核實而資鼓舞此各學堂管理員教員任事多年應給獎勵之實在情形也此外各府州縣所辦高等小學堂及師範簡易科陸續畢業者亦尙不少其管理員教員多自省城派往充選應俟彙齊另案辦理所有擬獎畢業學生並在堂多年之管理員教員謹開具清單恭呈御覽其非任管理教授之事如收支庶務等員概不列入以杜冒濫應請敕下學部核議施行

硃批學部議奏欽此

請獎梁鼎芬片

光緒三十三年七月二十八日

再湖北按察使梁鼎芬前主講兩湖書院嗣蒙簡放武昌府知府歷升今職當時未設提學司所有湖北學務均委該員辦理該臬司學術純正待士肫誠於教育事體大綱細目擘畫精詳任事多年勤勞最著雖據稱不敢仰邀議敘似未便沒其成勞合無仰懇天恩俯准將湖北按察使梁鼎芬賞加二品銜以昭獎勵之處出自逾格鴻慈

硃批梁鼎芬著賞加二品銜欽此

請獎紀鉅維等片

光緒三十三年七月二十八日

再臣自到湖廣任後博訪良師訓迪多士所任用各學堂教員類皆品學兼優之士其中篤學專精成材甚眾尤爲卓著者自應特予表彰以昭激勸內閣中書紀鉅維學行兼優深通教育理法切實懇摯諸生悅服擬請加內閣侍讀銜四品銜安徽霍山縣知縣楊守敬學問精博著書滿家講求輿地之學至老不倦該員係舉人出身擬請開缺以內閣中書選用廩貢生馬貞榆學術純正品行端潔足稱經師人師之選擬請以太常寺博士選用通判銜湯金鑄覃研算術精勤不倦善於教士

成才如林擬請以通判不論雙單月儘先選用通判銜
羅照滄精於測繪之學課士甚勤鄂生多能測量畫圖
實該員一人之功擬請以通判不論雙單月儘先選用
度支部郎中曹汝英精通西算啓誘有方所撰算學教
科書爲學堂中最善之本擬請加四品銜以上六員皆
在各學堂教授有年深資得力公論交推臣與之時相
過從講論學術研求教法其品詣成效臣所深知合無
仰懇天恩俯准照擬給獎以彰宿學而重師範實於學
務大有裨益

硃批該部議奏欽此

恭報交卸起程日期摺

光緒三十三年八月初二日

竊臣於光緒三十三年七月初三日准軍機處電傳奉旨張之洞著迅速來京陛見有面詢事件湖廣總督著李岷琛護理欽此適臣先因肝鬱受傷心血虧耗怔忡不寐病體難支前於六月二十九日具摺請賞假二十日靜心調養七月十一日奉硃批著賞假二十日假滿迅速來京欽此仰見聖明體恤微臣之至意跪讀之下感悚難名竊臣遠離闕廷四易寒暑依戀之悃無時或忘恭聞召命欣忭曷勝遵卽延醫趕緊調理惟鄂中本年酷暑時證甚多臣因受熱致患腹疾瀉痢交作又兼

日夜勞瘁夜間往往通夕不能成寐氣喘舌燥益形委頓曾經電達軍機處查照現在雖未全愈不敢不力疾就道茲將鄂省一切重要事件略爲部署並向護理督臣及司道等詳細告知於八月初二日將湖廣總督關防王命旗牌文卷等項委員賁送護理總督湖北布政使臣李岷琛接收任事臣卽於是日交卸渡江力疾由鐵路火車起程趨詣闕廷跪聆聖訓
硃批知道了欽此

會奏監國攝政王禮節摺

并單 光緒三十四年十一月二十日

十月二十二日奉上諭朕欽奉 慈禧端佑康頤昭豫

莊誠壽恭欽獻崇熙太皇太后懿旨現命攝政王載灃
監國所有應行禮節著內閣各部院會議具奉欽此又
於十一月十五日欽奉上諭前奉 大行太皇太后懿
旨命攝政王監國所有應行禮節著內閣各部院會議
具奏欽此事隔多日尙未覆奏著各該衙門妥速定議
毋再延緩欽此欽遵各在案當經行取各部院衙門呈
具說帖各抒所見臣等並將奉旨交議大學堂總監督
劉廷琛御史蔡金臺趙炳麟給事中忠廉等及御史江
春霖謝遠涵史履晉葉芾棠等先後條陳會同各部院
衙門公同詳慎擬議悉心采擇其說帖條奏切中事理

者均經采擇列入間有揆諸時勢不無窒礙之處亦未便采取謹將會議監國攝政王禮節列爲十六條謹繕清單恭呈御覽伏候欽定如蒙俞允臣等再將應行舉辦各事宜知照各衙門次第舉行一體欽遵謹合詞恭摺奏聞再御史史履晉未經書奏合併聲明計開

一告廟監國攝政典禮崇隆應請諭旨擇期派員告祭太廟並由攝政王於 大行太皇太后几筵前祇領監國攝政王冊寶冊文應恭錄十月二十日二十二日兩次 大行太皇太后懿旨毋庸另行撰文

一詔旨軍國政事及黜陟賞罰悉由監國攝政王裁定
仍以諭旨宣示施行凡重大事件有必須請 皇太后
懿旨者由監國攝政王面請施行他人不得擅請擅傳
一稱號監國攝政王在 皇太后前稱臣行臣禮諭旨
內稱監國攝政王時不書名監國攝政王稱 皇上曰
皇帝王對眾自稱曰本攝政王稱近支尊屬及諸王公
以爵其餘五品以上及翰林院編檢以上稱其官六品
以下稱其姓名貝勒以下文武大小臣工皆稱攝政王
自稱名近支尊屬及諸王皆稱攝政王自稱其爵
一代行祀典 皇上未親政之前所有壇廟大祀及現

在喪祭均由監國攝政王代詣行禮其是否另行遣員恭代行禮之處由該衙門先期請旨遵行

一軍權 皇上有統率全國海陸軍之權凡憲法綱要內所定 皇上下大權關係軍事者卽屬之於攝政王其京外旗綠各營海陸各軍應歸攝政王節制調遣

一典學 皇上典學時學業及師傅勤惰均應由監國攝政王考察照料

一朝會班次凡遇 皇上升殿受賀及萬壽聖節監國攝政王皆不與列在宮中行家人禮如遇 皇太后慶賀大典監國攝政王另班行禮毋庸隨班王公百官於

朝賀後分班詣監國攝政王前致賀監國攝政王在文華殿受禮王立受或答揖近支王公屬尊者別爲一班居前列所司官員先期開單請示屆時傳諭免先退後其餘王公百官行三叩禮王百日孝滿後擇期在文華殿班見王公百官禮亦如之

一朝見坐位擬請於養心殿中設御座并設案東側設監國攝政王座座前亦設案王公百官遇有應行跪安謝恩各禮節皆向御座恭行每日召見王公百官該員先向中設御座跪安起入東煖閣啟對依東設案中設監國攝政王椅座旁備略矮杌櫈監國攝政王先在座

如命召對之員坐卽各就机坐如不命坐則侍立啟對
畢監國攝政王命退卽退出王公百官內除近支王公
親屬外其餘王公百官非由監國攝政王傳諭進見者
均不得私謁府第至遇有軍國要政王公大臣准其隨
時於便殿請對傳見方可入見王公百官遇有升賞之
事仍照舊制具摺恭謝 皇上天恩毋庸向攝政王叩
謝

一鈐章署名凡有諭旨均請攝政王鈐章由軍機大臣
署名然後遵奉施行至攝政王如有面奉之懿旨一併
由王署銜鈐章軍機大臣仍均署名

一 文牘款式凡臣工章奏仍書 皇上聖鑒字樣如章奏文移中有稱述監國攝政王者拾寫一格

一 代臨議院議院成立時監國攝政王應代行蒞會之禮尋常會議毋庸入座資政院開院時亦由監國攝政王代行蒞院

一 外交凡與各國訂約遣使均由監國攝政王主持其接受外國國書及覲見各禮節由外務部分別妥擬奏明辦理

一 輿服護衛監國攝政王於乾清門外升輿降輿其輿服護衛從官等應備事宜並詳細章程應酌量比照攝

政睿忠親王體制成案由該管衙門分別擬議奏明辦理

一用度經費攝政王用度經費每年由度支部撥銀十五萬兩交內務府支應

一邸第擬請於中海迤西集靈囿地方修建監國攝政王府第另於東華門內三所爲監國攝政王隨時起居休息之所

一復政俟 皇上年長學成屆舉行大婚典禮時大小臣工集議合詞陳請 皇上親裁大政

右以上各條如有增減修改之處均由監國攝政王裁

度酌改施行他人不得擅違擅改

遺摺

宣統元年八月二十一日

竊臣於本年五月感患肝胃氣痛迭蒙聖恩賞假調治嗣於本月二十一日因病勢沈重奏請開缺恭奉上諭張之洞奏請開去各項差缺一摺大學士張之洞公忠體國夙著勤勞茲因久病未痊朕心時深廑念著再行賞假毋庸拘定日期安心療養病痊卽行銷假入直並賞給人模二兩俾資調攝所請開去差缺之處著毋庸議欽此並蒙監國攝政王親臨臣寓視疾恩遇優渥感激莫名無如病勢已深醫藥罔效虛邪日盛正氣潛消

迨至二十一日酉戌之交加以痰壅氣墜汗出如瀋氣
息僅屬生機將盡永違覆禱圖報無期言念及茲涕洟
橫集伏念臣秉性愚庸毫無學術遭逢先朝特達之知
殿試對策指陳時政蒙 孝貞顯皇后 孝欽顯皇后
拔置上第遇合之隆雖宋宣仁太后之於宋臣蘇軾無
以遠過備員詞館洊升內閣學士凡有所見剴切直陳
均荷優納嗣蒙恩簡授山西巡撫繼復奉命總督兩廣
湖廣再權兩江際 德宗景皇帝勵精圖治臣仰秉廟
謨竭蹶從事忝膺疆寄幾三十年雖轄境幸得粗安而
中更事變憂患紛乘末由防弭於幾先類皆補苴於事

後凡所設施動與願違勞而鮮功夙夜負疚復膺殊遇擢授閣職參預機務入直以來正深祗懼重遭國恤

兩宮升遐幸我 皇上紹承大統我監國攝政王以恭儉勤慎輔導聖躬大局獲安人心望治臣雖年逾七十猶思竭其愚慮裨補聖明何期衰病侵尋寢致綿悞臣平生以不樹黨援不殖生產自勵他無所戀惟時局艱虞未能補救累朝知遇未能仰酬將死鳴哀不敢不摅其愚忠泣陳於 聖主之前當此國步維艱外患日棘民窮財盡百廢待興朝廷方宵旰憂勤預備立憲但能自強不息終可轉危爲安伏願我 皇上親師典學發

憤日新所有因革損益之端務審先後緩急之序滿漢
視爲一體內外必須兼籌理財以養民爲本恪守 祖
宗永不加賦之規教戰以明恥爲先無忘古人不戢自
焚之戒至用人養才尤爲國家根本至計務使明於尊
親大義則急公奉上者自然日見其多方今世道陵夷
人心放恣奔競賄賂相習成風尤願我 皇上登進正
直廉潔之士凡貪婪好利者概從屏除舉直錯枉雖無
赫赫之功而默化潛移國家實受無窮之福正氣日伸
國本自固凡此愚誠之過計皆爲聖德所優爲儻荷聖
明采擇則臣雖死之日猶生之年抑臣尙有經手未完

事件粵漢鐵路鄂境川漢鐵路籌款辦法迄今未定擬請旨飭下郵傳部接辦以重路事鐵路股本臣嚮持官民各半之議此次粵漢鐵路鄂境川漢鐵路關係繁重必須官爲主持俾得早日觀成並准本省商民永遠附股一半藉爲利用厚生之資此尤臣彌留之際不能不披瀝上陳者也謹口授遺摺叩謝天恩伏祈聖鑒

商訂兩湖境內粵漢鐵路暨鄂境川漢鐵路借款

合同摺

定稿未奏

竊光緒三十四年六月二十日欽奉上諭陳啟泰奏粵漢鐵路宜定統一辦法懇遴派廉明大員督辦路務一

摺粵漢幹路關係南北交通最爲重要前經張之洞收
回自辦極費經營乃數年來官紳商董意見參差迄無
成效長此因循必至坐失大利貽誤路政自應簡派大
員統一事權方可早日觀成著派軍機大臣大學士張
之洞兼充督辦粵漢鐵路大臣會商郵傳部及三省督
撫督飭在事官紳商董認真籌辦所有路務大端由該
大臣通籌三省全局體察情形隨時主持裁定務令各
派意見聯絡一氣以免曠日虛糜致妨交通要政欽此
又於十二月初六日欽奉上諭陳夔龍奏鄂境川漢鐵
路與粵漢路相輔爲用請簡大臣兼充督辦一摺前因

粵漢鐵路開鑿重要特派大學士張之洞爲督辦大臣
鄂境川漢與粵漢兩路本屬相輔自應聯爲一氣方能
妥速成功著派張之洞兼爲督辦鄂境川漢鐵路大臣
會商郵傳部湖廣總督督飭在事官紳認真籌款興辦
卽責成張之洞力任勞怨剔除弊端嚴定期限因時制
宜主持定斷郵傳部暨湖廣總督均須實力協助不得
掣肘以一事權而重路政欽此各等因欽遵在案仰見
聖明專任責成重視路政之至意欽悚莫名查湖北湖
南境內粵漢鐵路自武昌府省城起至湖南郴州屬境
止約長一千七百餘里鄂境川漢鐵路幹綫自宜昌經

荊門襄陽至廣水止支綫自荊門經沙市至漢陽止共約長一千六百里兩路地段綿亘工費浩大非有的款五千萬兩難以觀成臣前在湖廣總督任內於光緒三十一年八月間奉旨將粵漢鐵路收回自辦後屢經籌款招股期早興修而時閱數年籌撥官款爲數甚微招集民股亦僅百數十萬元毫不濟事誠以中國財源枯竭商力未充欲成此縱橫兩大幹路工程舍借款無速能興修之方築室道謀歲月易逝坐視東南精華內蘊之區交通梗阻何如早借鉅款同時並舉利源旣開籌還自易臣於上年十一月間曾將借款只在章程周妥

路權不失並無流弊各情形奏陳在案並奏調湖北提學使高凌霨暨引見在京之湖北施鶴道曾廣銘派令隨議借款查照光緒三十一年籌借英款贖回粵路成約辦理先與英商中英公司代表人濮蘭德而議兩湖境內粵漢鐵路借款規條自上年十一月杪開議至本年二月逐日會晤未能成議又續奉諭旨督辦鄂境川漢鐵路亟須兼顧統籌深恐延宕時日有誤要工乃一面與德商德華銀行代表人柯達士將粵漢鐵路借款辦法大綱商定各寫函約爲據大概均仿照津浦鐵路合同辦法惟折扣從輕年限縮短則較津浦合同爲優

後經英國政府與駐京使臣先後向中國駐英大臣及外務部援據舊約仍請重議借款並改派匯豐銀行代表人熙禮爾來商復經臣督飭高凌霨等再與磋商英商以中英公司係英法兩國商人合股所設今該公司既不與聞借款匯豐純係英國銀行仍願與法商東方匯理銀行合辦以全交誼爲請乃令英法德三國銀行合借兩湖粵漢鄂境川漢兩路款項定額英金五百萬鎊粵漢用英總工程師川漢用德總工程師三銀行協商兼旬均經允從嗣比國以所購合興公司金元小票尙未收清亦藉詞出攬借款臣查此項金元小票係由

美國轉售比國當日贖回粵漢鐵路時比商不肯按照美國所訂之價退還曾與前出使美國大臣梁誠商定暫仍按期付息計美金二百二十二萬二千元現比人既藉詞干涉英德銀行亦以此事於歐洲借款債票有礙應先收回此項小票以清軫輻因議加借英金五十萬鎊備還比款定議後借款修路分爲二事另指的款作押祇作擔保之用將來還本還利仍取給於鐵路進款至所指各項的款先經臣電商鄂湘兩省督撫以湖北省百貨釐金二百萬兩川淮鹽局江防加價四十萬兩光緒三十四年八月新加鹽釐二文捐三十萬兩湖

南省百貨釐金二百萬兩兩湖振糶捐鄂款二十五萬兩湖南鹽道庫正釐二十五萬兩合計五百二十萬兩約符借款抵押之數該銀行等均無異說乃與訂立借款合同二十五條名爲中國國家湖北湖南兩省境內粵漢鐵路鄂境川漢鐵路五釐利息借款係英金五百五十萬鎊內計兩湖粵漢路用二百五十萬鎊鄂境川漢路用二百五十萬鎊收還比國金元小票用五十萬鎊利息俱長年五釐九五折扣股票由英法德三國銀行合認分售以二十五年爲期如十年後中國籌有的款亦可全數清還惟每百鎊須加還二鎊半如在十七

年後卽無須如價照鎊還清測勘路線應由督辦大臣核准約計四年造竣於合同畫押後開工不得延至六箇月外所有建造工程以及管理一切之權全歸中國國家自行辦理訂用英德兩總工程師合同亦由督辦大臣核定施行至購料用人用款等事合同內有未詳盡者另寫附函存案以期彼此信守臣逐條核訂實係將借款修路劃分兩事於中國利權主權毫無損失至折扣之輕更爲中國歷來借款所未有以津浦鐵路借款比較計可多得十一萬鎊以郵傳部借款比較計亦多得五萬五千鎊若以向來九扣借款比較則所多得

二十二萬五千鎊矣固由歐洲市面票價隨時漲落之不同而此次所辦亦實屬異常切實並經臣嚴飭承議借款各員廉潔共矢仍將經手人員並無絲毫費用等語載入合同亦爲厯借外款所無之事臣查此次借款先因英商濮蘭德藉詞要挾枝節橫生致令磋議閱五月餘會商至百餘次竭力磋磨始得與匯豐德華兩銀行定議猶幸主權未失折扣極輕且款由三國分借勢利平均實無絲毫流弊當經臣將此項合同轉商之外務部王大臣詳細校閱亦均意見相同謹繕具合同並附函清單恭呈御覽伏祈飭交度支部詳細核議俟經

議准再行簽押由外務部照會英德法三國使臣飭令該銀行等按照合同妥速辦理並一面由外務部分別行知郵傳部暨各該省督撫等查照再查光緒三十四年十二月初十日會議政務處議覆度支部奏清理財政宜先明定辦法一摺內開嗣後募借外債之權專屬度支部凡各部各省擬借外債皆咨明度支部由度支部出名訂借又各該部該省如願自向外國放債之人相商者祇准商定辦法仍須統歸度支部出名立約承借均不得逕向外國訂約借債各等因在案臣奉旨督辦粵漢鐵路兼鄂境川漢鐵路現在商借外債自應遵

照奏定章程辦理惟政務處議訂此章係在光緒三十四年十二月初十日臣奏請訂借外款係在十一月十六日是臣開議借款辦法在政務處新章未出以前既已與各國銀行開商勢難中止是以此次借款欲令就我範圍不越三十一年所訂照會限制之外臣尤不得不逕與開商以期一手商辦庶不至有所歧異惟有俟將合同訂定後應否照准仍請飭交度支部核議以重部章合併聲明

密陳磋商借款情形片

定稿未奏

再此次借款臣前經奏明與英公司商借在案緣前贖

回粵漢鐵路時美公司知中國財力艱窘於簽訂合同時故迫中國以極短促之交款期限意在使中國屆期款不能交即可藉口全翻成局用計至狡彼時款鉅期迫急切難籌計自光緒三十一年八月初二日猝接前出使美國大臣梁誠電稱合興股東批准草約當經電奏於是月初六日奉旨准其畫押距美人限定是月初九日交款日期僅止七日鄂省司庫官局既無的款可指兩湖紳商士民於此等贖路要需更無人過問日夜焦慮繞室徬徨幸得商由漢口英總領事法磊斯介紹英香港政府借與中國英金一百一十萬鎊應交美款

得以如限匯至美京華盛頓全數交清所有以前粵漢鐵路已失之路權鑛權及明指暗包之一切權利皆得一概收回英政府敦睦邦交贊成盛舉俾中國得收回無窮權利自不能不與以酬報因於借款合同之外另給照會言明兩湖境內日後除中國自行籌款修路外如須向外洋借款當先向英國詢商開價如與他國所開息扣比較相同先儘英國銀行承辦如他國所開息扣等項較英國所開公道便宜仍由中國酌擇公道便宜者另行籌借各等情於酬報之中仍寓嚴防之意均經臣奏明有案故此大議借外款不得不先向英公司

開商以踐前言乃英公司代表濮蘭德於開議後要挾多端並不按照光緒三十一年八月所訂照會商辦始欲包工意在攬修路之權繼又欲凡用款時必令總工程師簽字意在干涉中國用人購料之權種種無理要求實出情理之外約經臣督飭議款委員嚴詞拒駁然舊案具在未便遽舍英商而謀諸他國故委曲磋磨延逾數月忽訪聞英人近正聯挈各國組織公司專爲干涉中國主權利權卽所謂長江一帶英人視爲勢力範圍又所謂實業同盟者是也此舉果成關係東南利害極鉅因思於其協議未定之先豫爲牽掣冀可挽回中

國大局查歐洲各國勢力足與英抗而不甚親睦者惟有德國德與中國交涉初亦用強橫手段繼因交誼日傷情好日薄乃急謀變計改用平和政策臣因於濮蘭德負氣翻議之際利用其儘可與他國另議之一言執爲英國代表允認我國可與他國借款之據立與濮蘭德停議以挫英人之氣卽日另與德商柯達士開議以震英人之心原擬徐圖轉圜將來卽以英德合辦爲兩全交誼之方粵漢川漢合借爲兼籌並舉之策德商得此機會一力承認息扣從輕嗣英人知已與德商定議果援案極力爭辯並由英政府向中國駐英大臣強詞

詰責經臣隨時函達外務部將濮蘭德不按照原訂照會辦理及無理要求各情形詳實申說又略示以如改派他家英商來商肯按照現與德商所定辦法辦理亦可與商鄂境川漢借款且當時與德商立約時業已聲明如英商據約力爭則兩湖粵漢借款仍應向英議借而以鄂境川漢借款屬之德商必使鄂境川漢路款歸德商承借兩湖粵漢路款歸英商承借庶可破英人之狡謀均長江之勢力斷不敢輕率定約墮其彀中英商見所謀不遂數月之間詭譎百出枝節橫生恫喝要挾無所不至臣堅持定見隨機應付逮與熙禮爾定議之

日仍加函存案聲明英國借款公司購買材料經理人另派代表人來中國承辦其原派之濮蘭德決令回國以後總不使此人干預此事以絕後患故此次借款磋商半年始克成議尙幸主權未失一概就我範圍則關係於兩省借款者事猶小關係於中國全局者事實大也

湘鄂兩省鐵路請永遠官商合辦摺

定稿未奏

竊臣前在湖廣總督任內遵旨將粵漢鐵路收回自辦後卽籌議興修三省路工辦法並及鄂境大江北岸之川漢路擬定同時舉辦各情形均經先後奏明在案嗣

於光緒三十二年十二月復具片奏請將各省商辦鐵路三十年後由官備價收回一半以後永遠官商各半利息亦官商各半等語當時尙以爲官款不易籌集商辦可期踴躍乃數年以來湖北雖已設立官局招集民股而應者寥寥湖南向由紳辦公司經理亦未籌有鉅款始知兩湖商民財力不厚如任商民自行籌辦斷難早日觀成然路長款鉅又不能不議借外款臣自上年六月十二月先後奉旨籌辦粵漢鐵路及鄂境川漢鐵路當卽詳查三省情形除廣東已集有商股毋庸再籌官款外所有兩湖境內粵漢川漢鐵路款項決意由官

借款興修以期速效惟借款既定前此湖北所設官局
湖南所立公司已經籌有之本省公款及商民股款礙
難與此次借款歸併一處致令帳目混淆現擬援照津
浦鐵路上年十一月二十五日所奏奉旨成案辦理查
津浦鐵路前經臣會同袁世凱梁敦彥具奏預定將來
官商合辦辦法迨至第十年後國家清還借款之時准
令三省紳商自集成本將此項股票撥與一半任其收
回此項津浦鐵路即爲官商合辦之路等語業蒙明降
諭旨允准在案惟津浦鐵路籌議借款之時該路尙未
開辦商股亦未動支現在湖北省之粵漢鐵路及鄂境

川漢鐵路數年前早經設局收股已將兩路幹綫測勘繪圖一律完竣湖南省之粵漢鐵路亦經紳辦公司分集公款民股兩項的款存儲待用所有兩省歷年攤還粵漢贖路借款及兩省官局公司歷年勘路購地用人購料華洋員紳薪費各項用款均經動支以後按年收入各項公款民股尙復源源而來必須先行預定將來官局與公司接洽詳細辦法爲官民永遠遵守之據庶足以昭大信而慰羣情現在借款修路全仗官力於建築未成期內一切用人理財諸大端自應統由官局主持其原有公司仍應並存卽責成派定之總協理事認

籌款招股隨時解交官局集成巨款爲民款一半地步
凡已入之民股及陸續招入之民股由官局按年發給
官息六釐官股亦由官局發給官息六釐均係分登簿
冊備路成之日官民合計歷年用款數目作爲實本除
開除行車養路官息局用各項外本年贏餘之款卽爲
餘利此項餘利每年按照官民實本成數一律勻分官
股係屬借款十年以後應還借本統由官股餘利付給
公款民股已繳之實銀既可備還借本准其按股支給
餘利官股以官局提用之日起算民股以交到公司之
日起算概不得以認定虛數索取官息餘利其公款民

張文襄公全集卷七十一
股以交足全路實本之一半爲期遲早任便不必迫以
年限以恤民隱如此辦法則官權不損分毫商民同享
路利上下一體憂樂與同實與上年十一月諭旨所云
勸導紳商協力相濟以溥樂利而昭大信之意相符至
兩省官局公司辦法容再另行訂擬詳細章程俾易遵
守所有兩湖官辦鐵路擬請援照津浦鐵路成案官民
同享樂利各緣由理合專摺奏請特降諭旨允准施行

張文襄公全集卷七十終

衡陽江楫校

張文襄公全集卷七十一

奏議七十一

謹案許君同莘原編彙輯前後謝摺
於奏議之末最爲雅正今仍其舊

謝授湖北學政摺

同治六年九月十六日

竊臣荷蒙恩命典試浙中於九月十五日揭曉後准浙
江撫臣咨接准吏部咨八月初一日內閣奉上諭湖北
學政著張之洞去等因欽此咨會到臣聞命之下感激
難名臣近畿下士詞館庸材上第本出於殊恩持衡重
叨夫渥寵乃會稽竹箭方懼有搜羅遺棄之材而江漢
文章復畀以提倡振興之任鴻施稠疊愚悃慙惶臣惟
有俟到任後矢慎矢勤於士習文風力求整頓以仰答

高厚鴻慈於萬一

謝授四川學政摺

同治十二年九月十三日

竊臣奉命典試四川出闈後接准四川督臣吳棠咨八月初一日奉上諭四川學政著張之洞去現出試差者俱著各赴新任不必來京請訓等因欽此聞命之下感悚難名臣學識謏陋迭忝持衡復邀重異俾留視學蜀才眾多誨養非易聖慈優渥報稱爲難惟有力持廉介事事認真以仰答高厚鴻慈於萬一俟前任學臣夏子錫將報部冊籍料理完竣卽行接印任事除由正考官臣鍾寶華回京恭覆恩命外所有微臣感激下忱理合

繕摺叩謝天恩伏祈 皇上聖鑒再臣尙未接篆此摺
係借用四川總督關防合併聲明

謝授國子監司業摺

光緒五年三月初一日

二月三十日吏部以國子監司業一缺帶領引見奉旨
國子監司業員缺著張之洞補授欽此竊臣畿疆下士
詞館備員文柄濫叨華銜忝領十七載玉堂供職愧鶴
料之虛糜三千人璧水觀型荷龍綸而晉秩仰承恩命
倍切悚惶伏念成均爲建學之宗司業處師資之地深
虞謫陋未稱班聯臣惟有守道持躬因材造士陳五經
而肅拜庶整諸生講學之規校十鼓以編摩益光聖代

右文之治勉摠蟻悃冀答鴻慈

謝授左春坊左中允摺

光緒五年八月初八日翰林院掌院學士代奏

據新授左春坊左中允張之洞呈稱本月初七日奉旨張之洞補授左春坊左中允欽此竊之洞畿疆下士學識迂疏胄司方愧乎竽吹坊秩仰蒙夫簡擢在漢代官稱中盾實依徼衛之清嚴在國朝名襲東寮無異詞垣之典校之洞惟有研精耽道益殫蛾術之修來稽古讀書冀答鴻慈之高厚

謝授司經局洗馬摺

光緒五年九月初十日翰林院掌院學士代奏

據新授司經局洗馬張之洞呈稱本月初十日奉旨張

之洞補授司經局洗馬欽此竊之洞勃海幹材詞林膚
學備員胄監晉秩承華愧涓壤之未酬惕冰淵而增悚
被楓陛重申之命躋芝坊六局之班恩渥龍光感深鰲
戴伏思唐志則司經列職有典藏圖籍之文班書則洗
馬標名具導引威儀之義雖制殊今古而秩等清華之
洞惟有懍彼鵷濡策其駑鈍研經訓而培根柢冀窺聖
道之藩籬飭官箴而勵廉隅仰答天施之高厚所有之
洞感激下忱理合循例呈懇代奏恭謝天恩等語臣等
謹繕摺奏聞伏祈聖鑒

謝授翰林院侍講摺

光緒六年二月初九日翰林院
掌院學士代奏

據新授翰林院侍講張之洞呈稱本月初八日奉旨張之洞補授翰林院侍講欽此竊之洞承華末秩藝苑疏材業守經生實典中古文之簿班躋侍從俾觀太史氏之書顧鷲集而滋慙被龍光而知悚伏念唐開文館始號詞林宋重儒修多居講職幽冀之士多椎鈍勉承樸學之宗風武宣之世考文章未覩緝熙之聖業之洞惟有研覃造道獻納摠誠以仰答高厚鴻慈於萬一所有之洞感激下忱理合循例呈懇代奏恭謝天恩等語臣等謹繕摺奏聞伏祈聖鑒

謝授右春坊右庶子摺

光緒六年六月初七日

六月初六日奉旨張之洞補授右春坊右庶子欽此竊
臣勃碣榦材瀛壺忝列中經許讀初陪文學侍從之班
邊事方殷未副獻納論思之職茲荷鸞章之新命更除
燕義之古官霑澤彌深循涯滋悚伏考晉馬彪之續志
東西京職亞率更唐龍朔之初年左右列名標中護自
非儔選鮮厯清塗臣惟有學勉芻蕘誠殫葵藿慕前徽
於雅士敢忘春秋華實之箴守大義於經生聊酬天地
栽培之厚

謝充日講起居注官摺

光緒六年七月初五日

本月初三日奉旨張之洞著充日講起居注官欽此竊

臣起家芸館忝領芝坊愧塵益之毫無荷天施之疊被
佩阜囊而珥筆旁丹宸以紬書伏考順治朝之典章日
講官職司經義四庫書之史例起居注古號專門臣惟
有非道不陳於前所書可法於後瞻天仰聖幸獲依香
案之仙風補闕拾遺豈徒詠玉珂之夜月益勤豹直冀
答鴻慈

謝授翰林院侍講學士摺

光緒七年二月十一日

本月初十日奉旨張之洞補授翰林院侍講學士欽此
竊臣北土迂儒西清濫列目論方慙於測海頭銜遽擬
於登瀛疊被鴻慈難名鰲戴伏念唐興講幄自開元中

始播賡歌宋定官儀於學士下親書名姓顧惟薄植謬
忝華資臣惟有守道不回竭忠無隱喬笙晦磬敢誇並
軌於閭圖帶赤荔青當紀殊恩於杜句益勵氷兢之操
庶酬露湛之施

謝授內閣學士兼禮部侍郎銜摺

光緒七年六月初四日

本月初三日奉旨張之洞補授內閣學士兼禮部侍郎
銜欽此聞命之下感悚難名竊臣幽州鈍士翰院疏才
數持節於輶車浮簪毫於柱下溯自蓬池濫列積資則
十八年有奇豈期薇省超遷拔置於同三品之上鴻施
逾分鼇戴難酬伏維左掖班清春卿秩重絲綸所繫批

答攸司考北宋之舊聞惟龍圖偶同其稱號讀乾隆之寶訓知鳳諾非可以沿譌臣惟有益罄愚衷不渝素守孤根獨立肫誠同葵藿之專干慮一長獻納備芻蕘之采冀殫所學少答殊知

謝授山西巡撫摺

光緒七年十一月十六日

本月十八日奉上諭山西巡撫著張之洞補授欽此聞命之下感惕莫名竊臣以迂儒厯官翰苑言事則屢煩輶鐸超資而忝掌絲綸朝議叨陪曾無汲黯居中之益聖慈曲庇豈有仲淹乞外之心渥荷恩言遽膺疆寄伏念晉省山河表裏饑饉浹臻地險陜則重在巡防民彫

劫則難於撫字知臣情殷戀闕俾近依右輔之封察臣
志在籌邊命遠扼偏頭之塞逾涯增悚刻臆難酬臣惟
有殫竭愚忱勤宣德意獎廉黜墨祇知以盡已爲忠教
旅利毗一本於愛人之道以仰答高厚鴻慈於萬一

謝賜福字摺

光緒九年十二月二十六日

竊臣忝綰疆符再更歲籥愧涓埃之未報敢寵賚之希
邀茲於本年十二月二十日賁摺差弁回省捧到御書
福字一方當卽恭設香案望闕叩頭祇領訖欽惟 皇
上蘿圖訪道椒寢延釐書披乙夜以時勤嘏備玉林而
日懋猶以萬幾之暇用宏百福之頒聖學淵涵十采炳

吉祥之字天題瑋麗一言括祿祉之文臣叨與鴻施感
深黿戴所願箕疇敷錫偕衢童壤叟以臚歡行看桂海
澄清胥烏弋黃支而受祐

謝頒賞聖訓摺

光緒十年三月二十六日

竊臣於光緒十年三月十七日由山西駐京提塘齎到
武英殿領出恩賞 穆宗毅皇帝聖訓一部當卽恭設
香案望闕叩頭祇領訖欽惟 皇上日新典學風動綏
猷乙夜勤思闡往代圖書之祕辰居布化念先朝彝訓
之垂仰惟 穆宗毅皇帝道懋緝熙治超隆古誕敷文
德體乾撰而懍幾康大告武成稟慈徽以揚光烈凡威

棧所震疊皆聲教所昭宣合典謨訓誥誓命諸體曰尙
書大哉一人之渙號分天地春夏秋冬六官爲周禮煥
乎五色之文章蔚爲中興登諸上理我皇上率循遺
矩誦述舊聞分目三十六條爲書百六十卷奎章輝映
燭天騰萬丈之光秘笈璘彬測海富十華之寶臣未司
勘校叨與頒施憶從木署簪毫鳳詔壯輶軒之色茲復
桐圻拜賜龍圖擴管籥之觀仰高深而莫贊微詞聞咨
倣而彌增惕志綸音未遠感十二年侍從之臣戎史常
新啟億萬葉承平之治

謝署兩廣總督摺

光緒十年四月二十九日

光緒十年四月二十八日內閣奉
上諭兩廣總督著張之洞署理等因欽此聞命之下
欽悚難名竊臣學術迂陋本非
任重致遠之才溯自蒙恩撫晉
以來徒以地方簡靜尙能從容
措置兩年於茲吏治民事粗有
條理才智精力已非有餘茲復
渥荷恩綸移治嶺表查兩粵濱
海臨邊形勢雄據民蕃物博庶
政殷闢臣之庸劣實恐不勝特
現值時事多艱整飭海防之際
分應勉策駑鈍稍效涓埃惟有
俟到粵後體察情勢殫竭血誠
實力籌辦以仰答高厚鴻慈於
萬一

謝授兩廣總督摺

光緒十年八月初十日

光緒十年八月初六日准吏部咨七月初三日奉上諭
張之洞著補授兩廣總督欽此謹恭設香案望闕叩頭
謝恩訖竊臣一介迂儒治晉無效甫覲光於日下旋假
節於炎洲籌邊無一得之長授任荷重申之寵數春秋
之典惟大國乃有兼圻稽漢史之文凡爲眞必須滿歲
懼負乘之逾量糜頂踵以難酬伏念時局艱難海疆赤
紫修攘並亟兵食交籌臣惟有甄訪才賢申嚴號令枕
戈待旦豈惟運甓以習勤擊楫臨流不僅酌泉以明志
導黑水而入南海奉揚徙鱷之皇威標銅柱而來越裳
激勵跼爲之士氣所有防務吏治當隨時與尙書臣彭

玉麟前督臣張樹聲及東西兩撫臣竭力籌辦以仰答高厚鴻慈於萬一

謝賜福字摺

光緒十一年二月二十日

光緒十一年二月十二日遞摺差弁由京回粵齋到御賜福字一方當卽恭設香案望闕叩頭謝恩祇領訖欽惟我皇上斟元溥化昭德誠民隆孝養於璇闈箕疇錫慶耀威棱於璣鏡榛麓延釐值歲琯之更新蒙雲書之下賁龍圖螭寶鼈戴銘恩竊臣丹徼守官紫宸瞻戀鸞迴一紙珍逾宋殿賜書燕喜六章榮比鎬京受祉仰藉天題吉語綏和五嶺之軍民願將化字祥符滌盪九

瀛之氛祲

謝京察議敘摺

光緒十一年二月二十日

光緒十一年二月十七日准吏部咨正月二十四日奉
上諭朕奉 慈禧端佑康頤昭豫莊誠皇太后懿旨三
載考績爲國家激揚太典中外滿漢諸臣有能恪共職
守勞勩最著者允宜特加甄敘以示優眷兩廣總督張
之洞籌濟軍事不分畛域著交部議敘等因欽此竊臣
北土疏庸南溟承乏屬渝盟之思逞爰征繕以同仇簡
將徵兵有愧邊樓之籌畫贏糧赴敵敢言甬道之勤勞
恭逢考績於虞廷遠荷頒恩於越嶠褒甄逾分感悚難

名臣惟有奉宸略以安攘資凱軍以騰飽從此濮鈞北
戶永銷兵氣於師中還瞻嵎鐵東瀛遠邇皇風於海外
益殫駑鈍仰答鴻施

謝賞戴花翎摺

光緒十一年七月二十八日

竊臣准護理廣西撫臣李秉衡咨准戶部咨光緒十一
年五月十五日內閣奉上諭廣西關外各軍屢獲大勝
深堪嘉尚兩廣總督張之洞撥軍籌餉用奏膚功允宜
一體加恩著賞戴花翎等因欽此恩言下逮感悚難名
伏念臣學愧鶡冠職兢鵠翼守官嶺表疆理交南憤鯤
身跋浪之祆氛稟鳶泊擣虛之廟算四正四隅之營陣

僅出偏師三郊三遂之芻糧敢言宿飽天威遠暢月捷
頻聞此前行力戰之勞皆中旨發蹤之效頒來汗號蠅
附尾以何功榮以羽儀黿戴恩而知重臣惟有益菟戎
備期阜邊儲當關嚴蟻穴之防橫海肄犀軍之隊取鯨
鯢而爲京觀戢兵賡周武之詩若鴻毛之遇順風賀聖
獻王褒之頌務殫驚鈍冀答生成

謝賜福字摺

光緒十二年三月二十一日

光緒十二年二月初九日差弁回粵齋到御賜福字一
方當卽恭設香案望闕叩頭祇領訖欽惟我 皇上道
涵萬彙德轉八埏綏藩安丹傲之氓躋於仁壽布澤奉

璇闈之訓必有豐年值鳳紀之更新荷龍章之下賁雲
書耀日海國生春臣職任珠江忱馳玉陛一字九疇之
錫綸綽榮叨兼圻兩載之恩涓埃未報稽同天於堯典
共慶東作西成之休徵覩益地於虞圖永頌北變南諧
之郅治

五十生辰恭謝恩賞摺

光緒十三年九月十五日

竊臣於光緒十三年九月十三日承准軍機大臣咨交
到恩賞臣五十生辰御筆籌邊錫福扁額一面御筆福
壽字各一方金佛一尊紫檀嵌玉如意一柄蟒袍面一
件小卷吉綢八件湯綢八件當卽恭設香案望闕叩頭

謝恩祇領訖伏念臣自分符竹遠隔觚棱壯也猶不如
人迂闊而遠於事葵誠雖篤曾無濟治之功藥物時須
積有妨賢之懼造道未深於學易省躬脩屈於知非方
慙雕朽之難期迺忝錫齡之下逮九重染翰以賤士而
荷天慈五十加年在疆臣尤爲異數交廣兩部籌邊愧
唐相之才奎璧雙輝錫福兼箕疇之壽莊嚴寶相普度
垂慈璀璨瓊枝捧盈知戒觀五采彰施之象如聞盛世
都俞推萬方衣被之恩并使全家溫煖臣敢不勤修封
守仰副生成依日升月恆之光宣內輯外悠之治蒲柳
之秋雖早太陽一照而生春桂薑之性常存晚節彌堅

於報國

謝京察議敘摺

光緒十七年二月二十五

光緒十七年二月二十三日准吏部咨光緒十七年正月二十四日內閣奉上諭三載考績爲國家激揚大典中外滿漢諸臣有能恪共職守勞勩最著者允宜特加甄敘以示優眷湖廣總督張之洞山東巡撫張曜實心任事勞勩不辭均著交部議敘等因欽此聞命之下感悚難名伏念臣下駟極庸上游濫領澤國之偏灾甫弭巖疆之伏莽猶潛阜民則憂杼軸之空肄武則慮火荼之懈德薄力小而所圖者皆任重道遠之功困知勉行

而所創者乃委曲繁難之事志迂效緩疚重慙深豈意
鴻施俯矜驚鈍青瑣縈滄江之夢微物自荷夫天慈黃
州瞻玉宇之高聖知不在於人後十年守土愧曾無仰
報之涓埃三考承恩乃疊荷褒榮之華袞感侔高厚惕
等冰淵臣惟有益殫藿悃不憚薪勞江流莫宗海之瀾
簣土勵爲山之志竊幸夔龍謬附邀虞廷車服之輝終
期藍筆宏開壯楚國山林之色

謝賞頭品頂戴摺

光緒十七年十二月二十三日

竊臣准戶部咨光緒十七年十一月二十五日奉上諭
戶部奏遵議楊昌濬奏請將解清甘肅新餉各員分別

獎敘一摺湖廣總督張之洞江蘇巡撫剛毅安徽巡撫
沈秉成均著賞給頭品頂戴以示鼓勵等因欽此聞命
之下感悚難名當卽恭設香案望闕叩頭謝恩訖伏念
臣業本儒冠任叨疆節勉濟輪臺之遠戍敢矜楚國之
餘波邀曲獎於絲綸進崇階於金紫勞輪轉餉千秋明
甬道之功才謝籌邊一品編會昌之集華顛知幸愚分
增惶臣惟有懇懇殫誠源源濟運飽塞垣之騰馬籌夜
唱以無憂慄梁水之濡鵜衣朝披而有愧仰比戴山於
天寵冀裨撮壤於邊防

謝交部從優議敘摺

光緒十八年閏六月 日

光緒十八年閏八月初五日奉上諭總理海軍事務衙門奏各省解清海軍鉅款請將籌辦諸臣量予獎敘開單呈覽一摺李鴻章於海軍鉅款悉心籌畫獨任其難張之洞等亦能力顧大局殊堪嘉尚大學士直隸督臣李鴻章前兩廣總督現任湖廣總督張之洞均著交部從優議敘等因欽此聞命之下感悚難名伏念海防重要之秋軍府新開之日規模廣遠經費宏多臣昔官五嶺以南勉從諸臣之後備宋庫封椿之用銜石有心助漢船橫海之勳涓流無補乃蒙褒嘉寵賁甄敘優加惟大局深繫乎宸厪故微勞亦邀乎渥獎絲綸仰誦冰谷

如臨臣惟有顧念時艱益修職守纖蘿息浪願無忘長
駕遠馭之圖種柳成陰敢自懈卧薪嘗膽之志

謝賜福字摺

光緒十九年正月初八日

光緒十九年正月初四日摺并回鄂齋到御賜福字一
方當卽恭設香案望闕叩頭謝恩祇領欽惟我 皇上
道開元會德育羣生握金境以闡乾苞奉璇闈而凝泰
祉六花瑞雪瓊霙占得歲之符一朶紅雲寶翰沛頒春
之典合朝宗之江漢同泳恩波統底貢之荆衡高臨福
曜欽承巍煥咸切軒轅臣冰履銘衷火維效職矢傾葵
而陽向北斗京華荷馭穀於天施東風律琯壇山石古

叶吉日以迎年堯母門高瞻祥雲而獻壽

謝賜福字摺

光緒二十年正月初十日

光緒二十年正月初九日摺弁回鄂賁到御賜福字一方當卽恭設香案望闕叩頭謝恩祇領欽惟我皇上治集蕃釐德符嘉瑞萬邦受祉爰歌魯頌之篇五福開祥遂衍洛書之秘欣茲歲首寵以宸題况逢文母萬壽之年豫效堯世三多之祝金天鸞鳳翔紫氣於雲霄玉篆龍魚燦乾文於綺繡臣久承恩遇未答涓埃荷一字之遙頒祇庶民之同錫穰穰有頌終慙文武之非才戶戶皆春願共江湘而拜賜

捐置義莊謝賜御書扁額摺

光緒二十年五月十六日

竊臣恭讀邸鈔光緒二十年四月二十四日內閣奉上諭禮部奏遵議大員捐田贍族可否賞給扁額請旨遵行一摺湖廣總督張之洞仰承先志捐置義莊養贍宗族古誼可風著賞給御書扁額一方交張之洞祇領以示嘉獎欽此旋蒙由驛頒發御書扁額一方到臣當卽恭設香案望闕叩頭祇領伏念臣世承素業遭遇清時以環堵之陋儒忝方州之重任楚游竊祿難忘風木之懷疏傳分金願廣朝廷之惠飫聞庭訓宜篤宗支值行葦忠厚之聖朝獎葛藟本根之常分日采耀天門之榜

圭筆生輝星躔騰奎府之文球圖共寶敷六行教睦之
治本周禮以興仁緬九世同居之風較唐賢而滋愧寵
榮逾量感悚交并臣惟有饘粥思恭漿冰勵操率食德
服疇之族眾戴高天厚地之君恩相勸勉以義門共鼓
歌於仁宇贈麥而追思堂構彌念教忠種桑而不計餘
饒惟知報國

謝賜福字摺

光緒二十一年正月二十日

光緒二十一年正月十五日差弁回甯賚到御賜福字
一方當卽恭設香案望闕叩頭謝恩祇領欽惟我皇
上德應三階仁周六幕奉城臺而篤祐撫禹甸以翔和

當羣萌甫達之辰正聖藻書祥之日攝提歲正天門騰
龍虎之輝嶠鐵陽回海浦息鯨鯢之浪榛蕃受福樗朽
知春臣淮海守官雲霄戀闕宣德音而綏民隱申師律
以暢皇威欣逢小往大來推筭通乾坤之氣從此外悠
內輯銷兵煥日月之光

謝慶典賞賚摺

光緒二十一年二月初五日

竊准兵部咨光緒二十年十月初一日奉上諭朕欽奉
慈禧端佑康頤昭豫莊誠壽恭欽獻崇熙皇太后懿旨
茲當慶典屆期加恩賞賚各省總督各賞大壽字一張
大緞二疋帽緯一匣以示行慶施惠至意等因欽此又

因臣呈進 皇太后萬壽貢品蒙恩賞壽字一方蟒袍

一件活計一匣又蒙恩賞福壽字各一方三鑲玉如意

一柄蟒袍一件八絲緞二疋均於本年正月內由湖北

委員暨差弁恭賚到臣當卽恭設香案望闕叩頭謝恩

祇領伏念臣任忝連圻效無撮壤際昌辰之行慶叨大

賚之同霑雲章比重於球圖九疇敷錫天寵昭文於黻

冕五采彰施乃復曲鑒葵誠疊頒穗篆獻芹知陋愧儒

生寒素之圖書采菽承恩耀內府駢蕃之瑰寶對揚莫

罄報稱何從臣惟有冰操常懷春暉永戴九如作頌敢

忘報上之忱三錫占爰願祝師中之吉進千秋之金鑑

愚忠竊附於唐臣稱七月之兇觥聖壽同符乎幽雅

謝子權外用摺

光緒二十一年八月二十六日

竊臣恭閱邸鈔本年六月初八日臣子權由吏部帶領引見奉旨漢廕生張權著外用等因欽此聞命之下感悚難名伏念臣忝承恩寄無補時艱方憂負乘之貽譏遑計箕裘之克紹臣子權乙科倖列午舉非倫蟻術徒勤驚庸滋愧傳家寡學尙輸顏測之得文信道未能敢擬漆雕之人仕仰荷推恩之典猥叨任子之榮渥澤逾涯兢懷臨谷臣惟有勤修官守嚴勵義方九陞瞻天緬木正從繩之訓一門戴德殫葵傾向日之誠以仰答高

厚鴻慈於萬一

謝賜雙福字摺

光緒二十一年十二月二十九日

光緒二十一年十二月二十四日差弁賁到御賜福字
二方一賞臣兩江總督署任一賞臣湖廣總督本任當
卽恭設香案望闕叩首謝恩祇領欽惟我 皇上乾坤
合撰奎璧同文右徵左宮鳴玉承歡於蘭殿東鵲西鰈
貢珍集慶於蘿圖以微臣兩鎮之蟬聯荷聖藻雙毫之
齊下春偕鳳至風雲律呂以諧笙福必駢臻日月光華
而合璧類胥臣之再邀賞命等世忠之獎及兼官申命
便蕃對揚惶悚臣攝官淮海宣德荆衡際重熙累洽之

昌期祝再熟屢豐之靈貺吳頭楚尾恩波通一帶之江河圖洛書瑞氣護雙南之寶

謝賜福字摺

光緒二十二年十二月二十七日

光緒二十二年十二月二十四日摺弁齋到御賜福字一方當卽恭設香案望闕叩頭祇領欽惟我皇上道端五始德嚙八紘同天考靈曜之樞澤物被慈雲之蔭文治內而武治外統握乾符陽卦長而陰卦消世開泰運編楚國歲時之記仰周京雲漢之章敷錫同欽拜賜滋悚臣抱冰有志撮壤無功勤修有翼之師干冀覩大同之文軌今多雨露應蒼龍鑾輅以行春身在江湖望

金爵觚棱而結想

六十生辰恭謝 皇太后恩賞摺

光緒二十三年八月十二日

光緒二十三年八月初十日差弁回鄂齋到由內務府
發出 皇太后恩賞臣六十生辰御書綬疆錫祐匾額
一面敕歷宣勤嘉茂績靖共介福錫蕃釐對聯一副福
壽字各一方御筆長壽字一軸御筆蟠桃圖一軸御筆
雲蝠團扇一柄御筆蓮花摺扇一柄無量壽佛一尊嵌
玉如意一柄蟒袍面一件大卷江綢十二匹臣當卽跪
迎至署恭設香案望闕叩頭謝恩祇領伏念臣早官侍
從洊歷方州屢賜對揚久蒙煦育董生強勉未聞日起

之功燭武無能何補時艱之會數絳縣庸愚之歲甲荷
珠宮寵命之天申勉以綏疆榮以錫祜敝厯愧優賢之
選靖共勵正直之箴凡材總納於福林聖藻輝煌於壽
寓分媧皇五色之石炳爲大聖丹青頒王母千歲之桃
卽是長生膏醴團紈出篋忘秋氣以銜恩摺筵裁筠揚
仁風而阜物藝能天縱仰海涵春育之心擁護雲祥萃
河圖洛書之寶拯眾生於迷途苦海佛現金身望三楚
以時和年豐天如人意繡華蟲而勗汝翼煥雲繭以戒
周身仰揆榮施實逾愚分青瑣縈滄江之夢微物亦荷
天慈黃州詠玉宇之詞受知不在人後觀者咸詫爲殊

常之遇此生何以酬高厚之恩臣惟有履冰以勵官方
炳燭而勤老學撫漢上重來之柳生意頓增傾園中終
向之葵愚誠無改晚節香而秋容淡願方圃菊之詩壽
觴舉而慈顏和敬奏陔蘭之雅

六十生辰恭謝

皇上恩賞摺

光緒二十三年八月十一日

光緒二十三年八月初十日差弁回鄂賫到內務府發
出恩賞臣六十生辰御書宜猷篤慶匾額一面福壽字
各一方無量壽佛一尊嵌玉如意一柄蟒袍面一件小
卷吉綢八匹湯綢八匹臣當卽跪迎至署恭設香案望
闕叩頭謝恩祇領伏念臣庸侔社櫟任玷疆符溯當五

十之加年仰荷九重之錫羨陰符分寸未忘陶侃之習
勞報鮮涓埃已慨杜陵之遲暮歷一旬而加馬齒叨重
巽而霑鴻釐朶雲捧寶墨之花朝日射黃金之榜宣德
而共職守老愧壯猷篤恭以致昇平榮霑餘慶福開箕
範樂旱麓之烝民壽祝華封歌康衢之庶老旃檀法相
俾其灾沴消除玉柄光華期其設施如意虞廷黼黻榮
逾鄭伯之緇衣南國絲絃化盡楚邦之藍縷雲霞萬色
生南樓夜月之光輝江漢雙流瞻北極星辰於咫尺隆
天厚地臨谷增兢薄植孤根戴山知重臣惟有晚而學
道進思盡忠聊以拙而自修雖知難而不避四方多故

敢忘樞伏之壯心九軌經涂冀覩車攻之盛治懷程子
老而衰之訓一敬不渝讀毛詩下報上之章九如願頌
再臣同心仰蒙 皇太后恩賞應敬謹專摺叩謝理合
陳明

謝頒賞平定回匪方略摺

光緒二十三年八月十三日

光緒二十三年八月初十日差弁回鄂賚到御賞平定
陝甘新疆回匪方略一部平定雲南回匪方略暨貴州
苗匪紀略一部臣謹恭設香案望闕叩頭謝恩祇領欽
惟我 皇上化敷舜軫武闡軒經征不譴以迪前光恢
全功而臻大定溯自中原之偃伯猶餘邊徼之跳梁於

是續聖緒以殪戍稟徽音而柔遠斷匈奴之右臂直抵
三危攻南人之反心旁通六詔考元祖親征之記惟以
平回部爲奇功緬有虞舞羽之朝必以格苗民爲至德
今者花門效順貢天馬以來庭竹國銷烽祀碧雞而遣
使四百十卷之方略撻伐有光三萬餘里之皇圖蕩平
無滓仰欽簫勺莫罄軒輶臣昔忝史官曾窺柱下今叨
疆寄深愧籌邊歸鄆謹龜陰而春秋書平氏羌鬼方而
商頌作事爲後法如讀營平論屯穀之章安不忘危謹
誦宣聖贊芑桑之語

謝賜福字摺

光緒二十四年正月十二日

光緒二十四年正月初八日摺并同鄂賁到御賜福字
一方當卽恭設香案望闕叩頭祇領欽惟我 皇上玉
衡齊政丹展懸箴端春元以正朝廷百官光孝治以通
神明四海體乾行自強之義獨得正中秉震恐致福之
心不忘容儆日新德煥露湛恩多臣自矢靖共同瞻翔
洽深愧竹頭本屑乏上游鎮物之才所期穀穎麻蔡蒙
大有自天之祐

謝子權分部學習摺

光緒二十四年六月

日

竊照本年戊戌科會試臣子權中式一百八十六名貢
士恭閱五月十三日邸鈔新進士引見奉上諭張權著

分部學習等因欽此恭讀之下感悚難名伏念臣儒素
傳家使符叨忝素薄桓籛之陋敢疏趙簡之規臣子權
冀北羣愚城南困學濟時無具習宋人經義之文入彀
知榮綴唐代科名之記政觀六典遂釋屨而離疏恩被
一門如履冰而集木臣惟有以教忠爲家訓以守道作
官箴策其十駕之勤效此數飛之習聞韓琦之戒僚佐
勿廢讀書緬大夏之就部曹願通吏事俾紹家風之清
白仰酬帝澤之涵濡

謝賜福字摺

光緒二十五年正月十五日

光緒二十五年正月十二日摺并回鄂齋到御賜福字

一方臣當卽恭設香案望闕叩頭謝恩祇領欽惟我
皇上璣鏡凝釐璇宮秉訓黃圖無外揚如幄之徽音紫
氣來東錫禹疇之嘉瑞履端於始見黜邪崇正之天心
厚生惟和以尙德緩刑爲政要塞宣房而來萬福共戴
慈仁開閭闔而瞻九天高懸聖藻臣職司宣德地協朝
宗慙枯朽而同被陽春欲綢繆而亟乘閒暇鳳麟皆遊
於郊藪喜覩星雲鳬雁飛集於江湖敢忘魏闕已文作
繡舞舜羽而格遠方亥算書祥望堯門而祝慈壽

謝賜福字摺

光緒二十五年十二月二十四日

光緒二十五年十二月二十五日摺弁齎到御賜福字

一方當卽恭設香案望闕叩頭謝恩祇領欽惟我皇
上道探乾始運協皇春俾天地日月而奉無私應元亨
利貞而占有喜對時育物仰媯皇立極之功奮武綏邊
成大禹攸同之治金倉足國農工商分自周官銀幣惠
民圖方攢酌乎漢制大雅之詩備五福下及蜎蠊馬遷
之史談九瀛遠通文軌穗書錫祉葵向知春臣雕木庸
材抱冰愚悃堅庚孳子兆倉廩充衣食足之祥襟江帶
湖守勤民生討軍實之教鐘聞長樂祝釐合薄海之歡
笙叶上林獻歲結瞻雲之念

謝賞加太子少保銜摺

光緒二十七年十一月
日

竊臣恭讀邸抄光緒二十七年十月二十八日內閣奉
上諭朕欽奉 慈禧端佑康頤昭豫莊誠壽恭欽獻崇
熙皇太后懿旨劉坤一張之洞袁世凱共保東南疆土
盡心籌畫均屬卓著勳勞自應同膺懋賞湖廣總督張
之洞著賞加太子少保銜等因欽此聞命之下惶悚難
名伏念上年以來北畿倣擾南紀震驚致 兩宮之播
遷經一年而始定臣障川力薄瞻極神飛既未能提桴
鼓以收京又不獲執羈勒而捍圉外慚內疚有罪無功
至於遏豫境之妖拳殄長江之逆黨綏懷賓旅示中朝
無濫殺不辜之兵布告友邦知深宮有睦鄰修好之誼

凡此諸事無一非恪遵明旨仰稟神謨今者鐘簋依然
威儀重覩既舉居行之賞兼甄薪突之勞恭逢國是之
昭明豈意宮僚之濫附此皆由我 皇太后功德在生
民我 皇上信義孚萬國惟天心不遠而復故國勢轉
危爲安元祐手書多難而不忘黎庶興元赦詔責躬而
曲獎臣僚敢貪天以爲功實臨谷而滋懼臣惟有經營
筆路休養窮檐治兵求效於補牢興學圖功於炳燭范
文受賞曾何力於伐齊管仲納規願無忘於在莒

謝署兩江總督摺

光緒二十八年九月初八日

本月初六日承准軍機處電開內閣奉上諭兩江總督

著張之洞署理迅速赴任等因欽此竊臣一介迂儒才庸學陋溯從嶺海移治荆衡舉凡前茅中權後勁之軍儲訓農通商勸學之民事經營未訖疚悚良多茲復仰荷恩綸俾權江督伏念兩江鈐轄三省總督經緯百端內政綦繁外交尤重臣於光緒二十年奉旨署理任事歲餘更歷八年時艱愈亟思先甲後庚之役憤憂時迫於中宵處吳頭楚尾之間措置動關於大局臣惟有竭殫心力體察情形勤撫綏以輯民心慎交涉以維國體乘江漢東流而下彌念切於朝宗紓朝廷南顧之憂冀仰酬乎高厚一俟將本省要政及交涉重要各事趕緊

清理卽行馳赴署任合併陳明

謝賜松壽福壽字摺

光緒二十九年正月初十日

光緒二十九年正月初七日由驛遞奉到御筆松壽二字一幅福字壽字各一方頒賜到臣當卽恭設香案望闕叩頭謝恩祇領欽惟 皇太后至德函三宏慈育萬律溫玉琯輝生五色毫端墨染金壺灑向萬年枝上銀鉤鐵畫見宮廷天健之精神雪幹霜姿勗臣子歲寒之節操加以福林廣被壽域宏開比球圖雙耀以垂文似圭卣聯翩之拜賜叨榮稠疊揣分慚惶臣久綰疆符疊更歲籥渡江春早竊欣梅柳先知湛露陽晞頓覺桑

榆非晚慕松心之貞固必無改柯易葉之時祝謨壽之
延洪願譜朱萼白華之奏

謝賜福字摺

光緒二十九年正月十三日

光緒二十九年正月十二日兵部驛遞奉到御賜福字
一方當卽恭設香案望闕叩頭謝恩祇領欽惟我皇
上軒紀履端堯門稟訓璣衡七政敷箕疇嘉瑞於羣生
輿蓋二儀括天保祥符於一字千祥萬喜隨梅驛以俱
來二水三山望楓宸而非遠候十旬之東律初扇協風
統萬里之南溟胥蒙福蔭臣江湖迹遠霄漢心懸慶吳
頭楚尾之同春想鳧羽鳳聲之獻瑞衰朽無殊於社櫟

幸沐恩膏悃忱自矢以圖葵常依乾照

謝京察議敘摺

光緒二十九年正月二十七日

竊臣恭閱邸鈔光緒二十九年正月二十四日內閣奉上諭三載考績爲國家激揚大典京外滿漢諸臣有能恪供職守勞勩最著者允宜特加甄敘以示優異直隸總督袁世凱湖廣總督張之洞署理四川總督岑春煊盡心規畫勞怨不辭均著交部議敘等因欽此聞命之下感悚難名伏念臣久叨任寄未有殊能當茲上聖之殷憂自咎庸臣之負乘折衝樽俎有慚文武威風老病櫓舟無補東南吳楚豈意濫邀敘典曲鑒微忱盡心苦

汲綆之深規畫乏扣囊之智敝如車脚豈敢言勞孤似
竹根不知避怨以下士硜硜之自守荷聖人善善之從
長雖無關於江湖損益之微祇如鳬雁乃考績於日月
光華之世謬附夔龍忝竊何能循涯增悚臣惟有益勤
炳燭勉策鹽車體朝廷懸膽於戶之精神勵薄海眾心
成城之志氣願隨二三豪俊賡龍樓問寢之詩惜此分
寸光陰懷牧戲荒嬉之戒以仰答高厚鴻慈於萬一

張文襄公全集卷七十一終

新城王樹森校

張文襄公全集卷七十二

奏議七十二

謝賞紫禁城內騎馬摺

光緒二十九年四月二十四日

本月二十三日內閣奉上的諭湖廣總督張之洞加恩著在紫禁城內騎馬欽此伏念臣曩官禁近久處江湖據鞍非矍鑠之年攬轡鮮澄清之效茲者重覩漢官之禮初聞長樂之鐘渥荷龍光矜其馬齒踏黃榆綠槐之影隄岸忘疲聽玉珂金鑰之聲掖垣警蹕鴻慈加厚驚駕增惶愧筋力爲禮之未能矢感激馳驅以許國臣惟有叱馭竭忠負乘懷戒叨鈎膺之用錫敢方賢侯入覲之

榮恥髀肉之復生期副 聖主自強之志以仰答高厚
鴻慈於萬一

謝賜江綢貂皮暨融和福壽等字摺

光緒三十年
二月十九日

竊臣上年在京仰荷稷恩稠疊御賞駢蕃寶翰仙厨精
金文綺感戴惶悚罄於語言嗣經陛辭出京十二月二
十二日天津行次奉到御賜江綢四卷貂皮八箇二十
五日又於滄州行次由直隸督臣遞到 皇太后御筆
融和二字一幅福壽字各一方二十八日又於原籍南
皮縣由兵部遞到御賜福字一方均恭設香案望闕叩
頭謝恩祇領伏念臣雪柳往來松楸省視五章拜命比

相州畫錦之榮七葉承休勝漢室珥貂之貴融和煦育
萬物皆春福壽聯翩三光並燦值葭琯歲華之將轉欣
蓬門陽澤之先來鄉閭得覩天章頓開樸陋宗黨傳爲
盛事共美恩知臣惟有社櫟策庸野芹攄忱願偕父老
賡田間擊壤之衢歌瞻望闕庭祝寰海添籌之聖壽

謝賜畫扇紗匹摺

光緒三十年五月十五日

五月十一日差弁回鄂齎到 皇太后賞御筆畫蒲桃
扇一柄藍實地紗袍料一匹石青直經紗袷料一匹當
卽望闕叩頭謝恩祇領伏念臣自隔清光倏調燠琯法
從未忘於寤寐守官何補於涓塵茲者藻夏初炎芝泥

遠賁化工妙墨永清西域之風沙薰殿微涼垂念楚疆
之藍縷恩逾蔭暘懔比臨冰臣惟有體蘭陔養萬物之
心以麻衣害自強爲戒九齡白羽豈憂秋氣之遷移杜
甫香羅永頌聖情之感荷本宣德揚仁之意收除苛去
酷之功仰答高厚鴻慈於萬一

謝賜綢緞摺

光緒三十年八月二十二日

光緒三十年八月二十日摺并回鄂賚到 皇太后御
賞石青緞一匹絳色緞一匹茶色江綢一匹藍紅綢一
匹當卽恭設香案望闕叩頭謝恩祇領伏念臣雙符忝
綰一簪鮮功涼飈薦爽於秋中湛露叨榮於天上荊州

筐組深慚未效乎貢珍織女機絲猥荷優霑於枯朽甯
戚生逢堯舜安用布衣子牟身在江湖如依魏闕人間
攀桂未覺天高園內傾葵彌知日近臣惟有在勤勵俗
無斃銘恩勸學以化章縫治兵而修組練南樓月滿懲
據牀坐嘯之頽風東海波平推挾續拊循之德意以仰
答高厚鴻慈於萬一

謝賜福壽字如意衣料摺

光緒三十年十月二十九日

光緒三十年十月二十四等日差弁回鄂賁到
皇太后恩賞御筆大福壽字直幅兩張玉如意一柄蟒
袍料一件綢緞四卷當卽恭設香案望闕叩頭謝恩祇

領欽惟 皇太后聖矩從心祥笙敷化 聖母邁五龍
之齡而稱壽至尊合萬國之歡以事親頒奎璧之文章
煥星雲之光耀年豐人壽願天下福祿攸同治軍理民
俾微臣指揮如意覩繡黼虞廷之五采如聽賡歌誦緇
衣鄭伯之三章更增禮數仰叨大賚深愧殊榮臣惟有
拱向北辰撫綏南紀奉宣渥澤同戴春暉祝袞衣愛日
之方長臻文軌同風之極盛一慈二儉體宮庭爲寶之
淵衷洸武矢文效江漢朝宗之職守以期仰答高厚鴻
慈於萬一

謝賜福壽介壽字綢緞貂皮摺

光緒三十一年正月十九日

光緒三十一年正月十六日差弁回鄂齋到 皇太后
恩賞御筆福壽字各一方介壽兩字直幅一張綢緞四
卷貂皮八箇當卽恭設香案望闕叩頭謝恩祇領欽惟
我 皇太后寶尊慈儉德蘊含宏闢萬彙之福門游八
紘於壽宇遠頒寵賚濫及庸愚備穗書草聖之大觀兼
蟬耳鸞璣之珍品知臣如孔門之朽木錫以遐齡念臣
無漢相之種桑俾其適體受福王母有逾三接之榮章
縫儒生頓洗一寒之陋臣惟有奉宣徽懿加意撫綏合
三湘七澤之提封占再熟八蠶之瑞應分萬壽介眉之
餘慶納入新年聽三軍挾纊之歡聲防茲未雨

謝賜福壽字摺

光緒三十一年正月十九日

光緒三十一年正月十三日差弁回鄂賚到御賞福壽字各一方當卽恭設香案望闕叩頭謝恩祇領欽惟我皇上道出乾苞運符泰祉自強法天而不息明德與日而俱新鳳律宣溫福應盛而眾庶豫龍樓問寢壽觴舉而慈顏和猶復垂天上吉祥之雲化人間氛沴之氣儀璘雙煥翔泳同歡臣惟有力矢勉行冀收拙效顧瞻江漢縈倚樓看鏡之懷圖報涓埃勵覆簣及泉之志賜銀罍而吟臘雪如覩朝儀銷金甲而事春農同霑陽澤

捐建學堂謝賜御書扁額摺

光緒三十一年四月初四日

光緒三十一年四月初二日准直隸督臣袁世凱咨以
臣捐建本籍南皮縣學堂具奏仰蒙 皇太后頒賞御
書振民育德扁額一方驛遞至鄂臣當卽望闕叩頭謝
恩祇領伏念臣薛能粗官陸游老學渥承寵賚莫報殊
知昔疏廣賜金僅以宴游娛鄉黨桓榮車服徒以恩遇
誇子孫竊願推聖治之文明豈敢效前賢之弁陋德爲
行本欽取象於山風筆有化功燦爲章於雲漢子衿軒
舞衢叟臚歡臣惟有擴一鄉善士之陋風副百年樹人
之渥澤武城小邑人人習學道之絃歌豳國公堂歲歲
獻祝釐之觥酒以仰答高厚鴻慈於萬一

謝賜御書慈恩學堂扁額摺

光緒三十一年四月初四日

光緒三十一年四月初二日准直隸督臣袁世凱咨以臣捐建本籍南皮縣學堂具奏仰蒙皇上頒賞御書慈恩學堂扁額一方驛遞至鄂臣當卽望闕叩頭謝恩祇領伏念臣政才素拙學殖多荒幸叨堯母之恩綸惠及魯鄉之縫掖比原憲宰官之祿旁潤鄉鄰受文翁石室之經代籌刀布欽承聖藻錫以嘉名墨妙煥乎芝英文光生於蓬筆教忠孝俾飲水而思源不愆不忘常舉頭而見日臣惟有春暉矢報湛露逢晞勉薄植爲菁莪進陋邦爲鄒魯薄唐寺題名之記僅豔登科方西陂

賜額之榮無忘勸學以仰答高厚鴻施於萬一

謝賜畫扇紗匹摺

光緒三十一年五月二十五日

光緒三十一年五月二十日差弁回鄂賁到 皇太后
賞御筆畫山水扇一柄藍寶地紗一匹石青麻地紗一
匹當卽恭設香案望闕叩頭謝恩祇領伏念臣飲水畏
熱不學慙衰忝同法從之叨榮無異暍人之得蔭楓亭
妙繪招涼如卧雪之圖綺館奇珍耀采勝縷冰之蘭梅
炎麥氣逾唐宗手救之榮芟製荷衣洗楚國騷經之陋
恩光遠賁沈痼咸蘇臣惟有禮矢不違詩賡無斁調攝
仰遵乎懿訓奉揚遠被以仁風撫綏滴汗之耕農釐剔

行水之衙蠹奉新頒之法律大暑去而酷吏除廣實業之學科薰風來而吾民阜以仰答高厚鴻慈於萬一

謝子仁侃內用摺

光緒三十一年九月初一日

竊臣八月二十七日准禮部咨從一品廕生張仁侃光緒三十一年七月二十三日帶領引見奉旨著內用欽此當經照例以員外郎注册掣籤刑部行走等因咨行到鄂聞命之下感悚難名伏念臣運甓勞形納楹闕教猥荷絲綸之錫類俾叨簪笏以傳家臣子仁侃城南有志於讀書魯殿無聞於作賦離蔬釋屨遽薰晝省之香就日瞻雲如補黑衣之衛生成曲被報稱何從臣惟有

臨履銘恭困蒙勵學當殊俗橫流之會學禮不緩於學
詩際祥刑更化之朝讀書必兼乎讀律常矢教忠之古
訓仰酬延賞之恩施

謝賜綢緞摺

光緒三十一年十月初九日

光緒三十一年九月摺并回鄂齋到中秋節 皇太后
御賞緞二匹江綢二匹當卽恭設香案望闕叩頭謝恩
祇領伏念臣節旄久忝賁帛頻叨飄桂香而秋氣清潔
蘭膳而天顏喜海嶠冰蠶之寶光照江城星機雲錦之
華榮增儒素溫綸遠被稱服滋慙臣惟有安吉銘恩靖
共效職五章拜命勉臬謨有德之稱九月授衣廣幽雅

重農之化以仰答高厚鴻慈於萬一

謝萬壽賞賚摺

光緒三十一年十一月二十八日

光緒三十一年十一月摺并回鄂齋到十月 皇太后
萬壽恩賞綢緞四匹當卽恭設香案望闕叩頭謝恩祇
領欽惟 皇太后懿恭訓政仁壽登民披少廣之璇圖
握長生之寶籙分到萊衣之瑞彩文綺成霞洗將婁褐
之寒酸湛恩比露對揚荷寵臨履增惶臣惟有藹悃不
渝萱暉永戴八蠶溥利敢忘嫺祖之神功匹絹增榮益
勵胡威之清節以仰答高厚鴻慈於萬一

謝頒賞書經圖說摺

光緒三十二年正月初四日

光緒三十一年十二月二十九日差弁齎到頒賞欽定
書經圖說一部臣當卽恭設香案望闕叩頭謝恩祇領
欽惟我 皇太后堯門啟瑞禹甸敷仁我 皇上愛日
承歡同天稽古欲牖民而造士思繩祖以貽孫爰披聖
諭像解之編遂創書經圖說之作異武梁之祠象犧首
形奇勝列女之傳圖虎頭筆妙昔者楚壁繪螭山之伯
禹漢廷瞻斧辰之成王禹貢懸圖無逸觀象貫清濁以
畫河濟判黃赤以寫璿璣要皆摘取今文古文垂爲君
鑒臣鑒但摹一節未括全書豈若茲統五十八篇之訓
言綜千五百年之政要舉凡觀天察地之奧揆文奮武

之謨殫油素以描摹等羹牆之瞻覩傳心授受典謨觀
帝而誓誥觀王懸象著明日月行天而江河行地恩頒
縹帙喜溢青衿臣曾窺東觀之秘文常寶西州之漆簡
簿書倥偬學殖荒疏謹當率佔畢之儒生研疏通之書
教愧彩毫之摹本江淹不才對白首之短檠伏生未老
三墳五典陶成楚產之人才四海九州推暨虞廷之聲
教

謝賜福壽眉壽字綢緞貂皮摺

光緒三十二年正月初四日

光緒三十一年十二月二十九日差弁賫到 皇太后
恩賞福壽字各一方眉壽字一直幅綢緞四卷貂皮八

張當卽恭設香案望闕叩頭謝恩祇領欽惟我 皇太后履端布闔長樂延釐開殿前白獸之樽灑天上青麟之墨昭禹疇之好德箕範康強比魯頌之錫純梨眉難老暖逾布帛感九陛之溫言喜挾狐貂揚三軍之壯氣熙春行慶函夏臚歡臣智淺恩深拙多效寡申命占甲庚之卦迎年摹丙午之鉤感受祉之便蕃叨延齡於綽綽岐下五旬之衣帛難比殊施洛陽萬里之大裘願推慈惠

謝賜福壽字摺

光緒三十二年正月初四日

光緒三十一年十二月二十九日差弁賫到御賞福壽

字各一方當卽恭設香案望闕叩頭謝恩祇領欽維我
皇上運隆泰始道闡乾元樂只賡而福履綏慈顏和而
壽觴舉龍跳虎卧遙頒奎府之文章鸞囀雞鳴如覩皇
州之春色暉聯二曜露湛三霄臣荀齒徒加松心自矢
以百無一長之短綫處四通八達之衝衢甘漢陰抱甕
之勞懍燭武無能之懼欣逢北海南海車同軌而書同
文升平太平風應律而雲應呂

謝京察議敘摺

光緒三十二年三月初四日

竊臣於光緒三十二年三月初二日准吏部咨光緒三
十二年正月二十四日奉上諭三載考績爲國家激揚

大典湖廣總督張之洞謀慮精詳力任艱鉅著交部議
敘等因欽此聞命之下感悚難名伏念臣折衝智寡盤
錯才疏矢守瓶不假之愚誠懲覆轍相尋之鉅患桂海
文軫由勉強而及成功筆路山林敢貪天以爲己力郊
園葵藿亦霑雲露於日邊江渚鳬鷺倖附羽儀於皇路
則羣吹而愧濫叨上考而知驚臣惟有慎固邦交輯安
民志屏桔槔而灌圃殫畚插以移山謀野多能慙裨謚
四國之學任重道遠勵會參三省之功以仰答高厚鴻
慈於萬一

謝賜畫扇紗匹摺

光緒三十二年六月初四日

光緒三十二年六月初二日差弁回鄂齋到 皇太后
賞御筆菊花畫扇一柄藍直經紗一匹石青實地紗一
匹當卽望闕叩頭謝恩祇領伏念臣效官炎紀遠隔清
光方披梅笛之風適湛蓼蕭之露舜陞孝徵之翠簃珠
等招涼齊官方空之冰紗帛逾澄水秋花早秀炳上聖
丹青之化工熏殿微涼念下方蒼赤之苦熱此蓋不泄
不忘之聖度豈惟誠懽誠忭之恩私臣惟有隄蟻嚴防
澤鴻勤撫百里無資於暑蓋昌齡自懷以冰壺必表銘
恭如對天顏於咫尺延齡錫羨願宏壽寓於垓埏以仰
答高厚鴻慈於萬一

七十生辰恭謝 皇太后恩賞摺

光緒三十二年八月初五日

光緒三十二年八月初二日差弁回鄂齋到 皇太后

恩賞臣七十生辰御筆福綬南紀匾額一面御筆宏總
上流宣盡略贊襄新治重耆英對聯一副御筆長壽字
一軸福壽字各一方御筆畫牡丹直幅一軸御筆畫梅
花挂屏四幅無量壽佛一尊嵌玉如意一柄蟒袍面一
件各色綢緞紗十二匹臣當卽跪迎到署恭設香案望
闕叩頭謝恩祇領伏念臣爲政素拙不學知衰蹉跎而
效小忠彊勉以期行道幸追負乘之呵譴猥蒙錫嘏之
榮光仰分東朝福壽之餘策其南紀撫綏之效鑒陶侃

之忠順俾鎮上流期彥博之耆年倡行新法揮吹枯噓
生之神筆儼簪司馬之花寫鐵心石腸之奇葩如賜廣
平之飭金身穆若恍瞻覺世之慈顏玉柄溫其彌懍執
盈之臣戒煥考工之黼黻金紫交輝垂織女之機絲雲
霞異色軍民觀歎謂朝廷圖任舊人草木知恩覺枯朽
皆含生氣臣惟有斲輪勵老伏櫪忘衰講學而懸毫箴
論兵而摩霜鬢魯杞汜老不釋敬謹當無改厥初宋蘇
軾愚不適時猶將勉策其後以仰答高厚鴻慈於萬一

七十生辰恭謝

皇上恩賞摺

光緒三十二年八月初五日

光緒三十二年八月初二日差弁回鄂齋到恩賞臣七

十生辰御筆望重耆賢匾額一面御筆福壽字各一方
無量壽佛一尊嵌玉如意一柄蟒袍面一件各色紗十
六匹臣當卽跪迎至署恭設香案望闕叩頭謝恩祇領
伏念臣虛增馬齒已過耆年謬綰麟符久妨賢路心長
才短對新進而懷慙任重望輕誦榮褒而滋懼福林壽
宇炯如二曜之懸光寶相瓊枝佑其百爲之如意職有
愧於臯謨之日贊而締繡遙頒德不足當緇衣之好賢
而席宜疊賁天高露湛木集氷兢臣惟有炳燭殫勤據
鞍勵志松筠無改不憂晚歲之彫葵藿常傾頓覺夕陽
之好鵲鸞滿路豈資駑馬十駕之功砥柱百川敢效中

流一壺之助以仰答高厚鴻慈於萬一

謝賜綢緞摺

光緒三十二年九月初四日

光緒三十二年九月初三日摺并同鄂賚到中秋節

皇太后恩賞江綢大緞共四匹當卽恭設香案望闕叩
頭謝恩祇領伏念臣遙瞻紫極又屆金飈觀中澤之鴻
嗷愧在梁之鵠翼楚江風嫋知荷衣芰製之涼蓬島秋
澄覩霞綺雲羅之采變江潭之搖落柳絲漢南仰宮闕
之高寒桂香雲外章身荷寵刻臆難酬臣惟有體訪民
依勤宣上德固隄防而疏水潦實倉廩而謀蓋藏促同
巷之杼機增窮檐之襦袴青衿造士占賁帛以觀人文

組甲蒐軍賦同袍而敵王愾以仰答高厚鴻慈於萬一

謝賜綢緞摺

光緒三十二年十月二十二日

光緒三十二年十月十八日摺并回鄂齋到 皇太后
恩賞綢緞四匹當卽恭設香案望闕叩頭謝恩祇領欽
惟 皇太后龐鴻益嘏憲象新民欣逢良月之吉祥遠
賁綺霞之珍麗上方幣帛分龍庭舞綵之餘輝下土章
縫識繭館鳴機之瓊寶鵲濡驚寵輦戴增惶臣惟有吹
豳雅以稱壽觥織荆纁而興工藝負庫中之賜絹自愧
思多勵戰士以同袍豫占道勝以仰答高厚鴻慈於萬

一

謝賜福壽字摺

光緒三十二年十二月二十八日

光緒三十二年十二月二十六日摺并恭賀 皇太后
御賞福壽字各一方曼壽字一幅衣料四卷貂皮八張
到鄂當卽恭設香案望闕叩頭謝恩祇領欽惟我 皇
太后璣鏡斟元珠囊集瑞萃百福於榛桔增萬壽於臺
萊以曼殊師利之吉祥兼壽佛無量之悠久適周星紀
欣捧雲章八蠶吳會之絲七葉漢廷之珥緼袍不恥衛
風守道而非臧脂藥消寒唐殿頌恩而未渥天顏有喜
儼咫尺以不違民困未蘇愧涓埃之莫報臣惟有奉宣
膏澤撫輯疲甿徧谿壑以同春姿隔江湖而結遠悃日

如黃襖未逾天闕之溫綸樹比冬青願附康衢之庶老
幽風農業泯無衣無褐之嗟玉藻戎裝勵虎裘狼裘之
勇以仰答高厚鴻慈於萬一

謝賜福壽字摺

光緒三十二年十二月二十八日

光緒三十二年十二月二十六日摺并恭賚御賞福壽
字各一方到鄂當卽恭設香案望闕叩頭謝恩祇領欽
惟我 皇上用中執兩咸五登三張百度以維新納羣
生於在宥心正筆正念柳少師之格言福多壽多符華
封人之善頌球圖比重冰谷同兢臣舊學等於寒竽迂
材類平方枘不才多病陋青陽白髮之詩篇 聖主憂

民進瑞雪蒼龍之春帖惟殫心於鴻澤冀仰答夫龍光
謝賜畫扇紗匹摺

光緒三十三年五月初九日

光緒三十三年五月初六日差弁回鄂齎到 皇太后
賞御筆畫紅蝠靈芝並題三秀延齡扇一柄絳色實地
紗一匹石青麻地紗一匹當卽恭設香案望闕叩頭謝
恩祇領伏念臣炎維奉職黼辰馳忱值錦標采縷之良
辰拜月扇雲機之珍賞千年錦翼翔堯代之仙真五色
祥芝茁漢房之嘉瑞仰九重之孝養厨簋常搖懍咫尺
之嚴威殄絺必表延齡荷寵鏤骨銘恩臣愧無益智之
方夙矢揚仁之願喜麥隴桑疇之豐熟蠲秋荼夏日之

煩苛惟有偕軍民共樂舒長率官吏奉宣德意慈雲濟
世頓蘇火宅以清涼暑雨宜民盡泯窮檐之咨怨以仰
答高厚鴻慈於萬一

謝協辦大學士摺

光緒三十三年五月二十日

竊臣准吏部咨光緒三十三年五月十二日由內閣鈔
出五月十一日奉上諭張之洞著以湖廣總督協辦大
學士欽此聞命之下悚惕難名當卽恭設香案望闕叩
頭謝恩伏念臣早參法從游典方州以章句之小儒領
荆襄之重鎮滔滔江漢曾無文武之威風種種鬢毛深
愧鵷鸞之時彥豈意綸音渥渥鼎席叨陪羣吏歎爲殊

榮愚臣知其逾分昔者向敏中之耐官職默契朝廷范仲淹之拜參知遠籌邊事方昔賢而有愧被隆遇以難酬臣惟有偃僂滋恭經營匪懈江湖魏闕交縈報國之憂心舊學新知酌劑救時之良策以仰答高厚鴻慈於萬一

謝授大學士摺

光緒三十三年六月二十五日

竊臣准吏部咨所有大學士缺本部於光緒三十三年六月十四日開列具奏奉上諭張之洞著授爲大學士仍留湖廣總督之任等因欽此聞命之下悚惕難名當卽恭設香案望闕叩頭謝恩伏念臣廢學寒竽違時方

柄厯坊局而叨節鎮未敢干進以他途數治行以及軍
謀自知不踰乎儕輩迺者疊邀特達驟躋羣僚甫拜命
於新參旋承恩於端揆念其循資較久非同鳶肩火色
之才察其作牧有年責以熟路輕車之效穹天雨露獨
長養乎孤根秘殿絲綸俾與聞於外吏鈞陶至厚冰谷
如臨臣惟有居高思危堅忍負重守特立獨行之素不
逐頽波欽用中執兩之謨願襄上理以仰答高厚鴻慈
於萬一

謝授體仁閣大學士摺

光緒三十三年六月二十八日

竊臣准吏部咨光緒三十三年六月十八日奉上諭張

之洞著充體仁閣大學士等因欽此當卽恭設香案望闕叩頭謝恩伏念臣重申被命四輔聯班現綰使符俾登秘閣房喬直宏文之館張說紉壁府之書考宋代之東西廳分司機要溯國朝之內三院同掌絲綸雖職司時有變遷而禮秩最爲殊異菲材忝冒戰栗難名臣惟有罄補袞之愚忱策識途之微效羨魚結網欣逢善治更化之朝嗷雁求安仰體視民如傷之惠以仰答高厚鴻慈於萬一

謝授軍機大臣摺

光緒三十三年八月初七日

七月二十七日奉電傳上諭大學士張之洞著補授軍

機大臣欽此竊臣孤根疏薄曠代遭逢持符節已逾廿
年贊鼎鉉甫經市月片長未效內疚方深茲者甫乘述
職之鋒車遽荷中樞之簡命戰兢無措跼蹐難名伏念
今日時勢可謂多艱宮廷備極憂勞草野但求速效安
內之與禦外無本則鮮功求舊之與維新一偏則爲害
臣賦性如忘機之鷗鳥論才非熙績之夔龍有燭武之
老而無其奇謀有司馬之迂而無其德望豈敢不量斗
筭之器妄參帷幄之籌惟旣已遵旨北上得遂瞻戀之
忱豈敢稱疾徘徊自蹈辭難之咎惟有恪遵成命勉效
馳驅儻精神實有不支之時才具實無補益之處應請

恩准隨時乞休以安愚分而免貽誤不揣冒昧惶恐瀝
陳

謝賞西苑門內乘坐二人肩輿摺

光緒三十三年八月十四日

本月十三日內閣奉上諭朕欽奉 慈禧端佑康頤昭

豫莊誠壽恭欽獻崇熙皇太后懿旨軍機大臣張之洞
加恩著在西苑門內乘坐二人肩輿欽此聞命之下感
悚交并竊臣渥被恩知入參密勿值待漏趨朝之會慙
據鞍矍鑠之能仰蒙念其馳驅之有年不責筋力以爲
禮昇陶潛之藍輦何待山林賜桓榮之輜車等於師傅
天施逾量冰履難名臣惟有處逸思勞盡忠補過中書

無用知難辭禿老之譏周史有言敢不懷扶持之戒以
仰答高厚鴻慈於萬一

謝賞穿帶膝貂桂摺

光緒三十三年十一月初九日

本月初八日內閣奉上諭朕欽奉 慈禧端佑康頤昭
豫莊誠壽恭欽獻崇熙皇太后懿旨張之洞加恩賞穿
帶膝貂桂欽此聞命之下感悚莫名伏念臣恩知渥荷
樞密叨陪愧涓報之猶虛每冰兢以自惕茲迺仰承綸
詔榮賁珍裘雙珥同清雅稱金章之佩三英競粲渾如
玉帶之圍適體增溫撫衷滋愧臣惟有益殫駑鈍倍慙
鵷濡如羔皮之用素絲絨紘勵節比絺繡之施粉米黼

黻陳謨以仰答高厚鴻慈於萬一

謝管理學部事務摺

光緒三十三年八月十五日

本月十四日內閣奉上諭大學士張之洞著管理學部事務欽此聞命之下惶悚難名伏念臣機要與聞涓塵鮮補乃閑道仰塵乎上聖故典學任及於迂儒查學部爲教育之統宗人才之樞紐與時變通之謂道不忘其本之謂賢將以陶鑄羣才扶持世運如臣庸陋豈所能勝惟有稟承聖謨原本經義通溫故知新之妙用謹邪說暴行之大防有一長者升爲芷蘭不率教者移之郊遂志端向定如知天必視北辰博采兼收如百川納乎

滄海菴名老學敢讓詩客以精勤城諷青衿務期士風
之不變當隨時會商學部諸臣認真整頓以仰答高厚
鴻慈於萬一

謝充經筵講官摺

光緒三十三年十二月十六日

本月十五日翰林院以漢經筵講官一缺具奏奉硃筆
圈出張之洞欽此聞命之下感悚難名竊臣猥以迂愚
濫參機務晚學知寒竽之陋辰猷鮮補袞之功仰維天
縱之聰明彌切幾餘之念典新知培養增丹書訪道之
儒臣舊典無忘申金殿論思之職守自慙荒落深忝殊
榮臣惟有紬繹奎璧之秘書敷陳堯舜之治道陋張禹

之傳經學無補時艱宗程子之爲講官薰陶德性以仰
答高厚鴻慈於萬一

謝賞加太子太保銜並用紫纁摺

光緒三十四年十一月二十

七日

本月二十六日內閣奉上諭世續著賞加太子少保銜
賞用紫纁張之洞著賞加太子太保銜賞用紫纁鹿傳
霖著賞加太子少保銜賞用紫纁袁世凱著賞加太子
太保銜賞用紫纁欽此等因竊臣等猥以庸材過蒙先
朝恩遇樞垣待罪無補時艱茲以 皇上登極禮成恭
上 隆裕皇太后徽稱推恩錫類獎及近臣旣晉宮銜

復賜紫纁殊榮駢蕃聞命戰慄當卽於入對時瀝誠懇
辭至於再三迺承面諭切飭戒以勿得沽名徒煩筆墨
臣等惶悚無措不敢復有所言不得不敬謹遵旨此後
惟有竭此血忱同心共濟以仰答高厚鴻慈於萬一

張文襄公全集卷七十二終

新城王樹森校